

續文獻通考

三十一之三

漢書門			
類	號	函	架
二	四	三	一
一	三	一	一
一	三	一	一
一	三	一	一

內閣文庫			
函	架	冊	號
九	四	一	一
一	一	一	一
一	一	一	一
一	一	一	一

內閣文庫	
番號	漢 2431
冊數	81 (11)
函號	294 13





續文獻通考卷之三十一



淺草文庫

皇明進士雲間王圻纂輯

市糴考市

宋

孝宗隆興元年詔軍興以來一應朝廷科降并督視行府
 兩淮節制司江淮宣撫司都督府收買軍需蓋造營寨
 之類並係科撥經總制及支降激賞錢糧於州縣和買
 措置尚慮官吏夤緣掊歛不即還直許令人戶越訴仰
 所屬監司按治以聞 乾道六年臣寮奏每遇大禮凡
 所需之物動以千萬計有司但依例拋降近處州郡收
 買州郡則責辦於屬邑屬邑則取足於平民並不支還



續文獻通考卷之三十一

四百八

續文獻通考卷之三十一
價直又輦運所費不貲交納之際老奸宿猾邀阻乞取
人受其弊無不怨嗟臣謂三歲一舉希闕之典豈不能
捐十數萬緡錢選清強官於近便去處置場和買或許
客旅販賣依時價交易嚴立賞罰絕去奸弊乎詔從之
淳熙元年詔諸路州縣市令司日下並罷官司及在
任官收買物色並依民間市價支錢不得科抑城尅如
違以違制論許民戶越訴 壬子江西漕臣錢佃等奏
興國軍以公使庫酸敗酒散下通山等三縣抑勒百姓
高價收買臣等雖已禁止乞嚴行禁約詔監司開具散
酒當職官吏姓名申尚書省 五年四川制置胡元質
等奏夔路之民爲最窮而諸州科買上供金銀絹三色

民力重困所有大寧塩課委無增羨臣今與總領所及
本路轉運司公共措置已將塩課攢剩之錢買金銀發
納總領所及茶馬司蠲九州民間歲買之弊外有餘剩
錢若干可以盡免今年夔路諸州一年全科民間買絹
之數餘錢又可作民間每歲貼助之費民力可以少蘇
並從之 十一年臣寮言諸處夏稅和買止有折帛折
錢二色惟湖州吉安一縣獨多折絲折帛折綾民間困
于輸納朝廷以其旣納絹紬又以細絲織綾許以粗絲
織絹謂之屑絹自前任顏度申請改屑絹爲絲絹遂使
此邑重困續後邑民皆詣闕陳訴已蒙朝廷仍舊許納
屑絹而夏稅產絹猶有細絲乞令產絹亦依舊用粗絲

織造從之 臣寮言聞諸州軍受納夏稅官吏邀阻間
有將堪好絹帛強行打退却置場用低價收買其官中
既已買下退絹多作畸零折納高價不恤民病利其贏
餘欲望嚴禁今後州軍置場收買退絹許人戶越訴令
監司御史覺察違戾科罪從之

寧宗開禧三年詔紹興府均敷和買

理宗嘉禧三年臣僚言官司以官價買物行舖以時值計
之什不得二三重以遷延歲月而不償胥卒並緣爲奸
積日既久類成白著甚而蔬菜魚肉日用所須瑣瑣之
物販夫販婦所資錐刀以營升斗者亦皆以官價強取
之終日營營錢本俱成乾沒商旅不行衣食路絕望申

嚴禁從之

紹定時李鳴奏會稽郡賦重民貧以和買

一色言之其爲額當一路之半雖淳熙特與之蠲減紹
熙併與之均科而民之困於供輸仍在此無他其爲額
太重故也祖宗時貨輕而錢重錢之在官者先期而給
絹之在民者易歲而輸官既與民相資民亦樂爲官市
是之謂和買時異事變名存實亡價直弗償鑿空科取
無復有所謂買矣送輸少緩鞭撻即加無復有所謂和
矣重以物價翔踴視昔何啻數倍官但督迫民惟怨咨
嘉定庚辰朝廷將累歲實催之數按爲定額一半理估
行之十四載民力稍寬端平初元復催正色二年仍行
理估三年又催正色今以侍郎趙與權申請將列郡和

買一體施行難乎其為辭矣然尚有可得而言也朝廷之待會稽不當與諸郡等也永安陵寢弓劍藏焉歲時之祭享程度有常使命往來項背相望他郡有之乎其不同一也南陽帝鄉近屬居焉田連阡陌有司不敢問勢傾閭里庶民不敢較他郡有之乎其不同二也會稽有他郡所無之盛美宜得他郡所無之蔭覆今乃有他郡所無之騷擾而又負他郡所無之供輸為民父母獨不當為之動心乎臣自到官以來士夫之論議民庶之陳請莫不皆以和買重因為言臣伏而思之置而弗問則傷民行而大寬則傷國今不敢乞如淳熙之減額得如嘉定之一半理估足矣或曰放行一郡則援例而

者將何以拒之是不然會稽之特加優恤以其為額太重也以其有陵寢在也以其為毓聖之地也無是三者而輒以例言何例之援乎淳熙十六年詔於紹興府和買絹內特城四萬四千二百八十四匹不聞他郡援例也鑑湖古未有租今變為湖田輸于大農者六萬此會稽額外之產也朝廷獨知取而不知予乎欲望陛下特出睿斷將紹興府和買絹一項仍照嘉定十三年例一半理估施行使怨咨之氣消歌頌之聲作如是則祖宗在天之靈亦必歡忻悅懌矣此實祈天求命之一非但為一郡設也

遼

太祖神冊三年三月置羊城于炭山之北以通市易

太宗置南京城北有市東平郡城中置看樓分南北市異

中交易市比于漏下交易市南

聖宗統和三年十一月詔禁行在市易布帛不中尺度者

六年七月觀市 七年二月詔以南北府市場人少

宜率當部車百乘赴集開奇峯路通易州市 耶律隆

運為大丞相以南京歲不登請免百姓農器錢又請平

諸郡商賈價從之

道宗咸雍七年四月禁布帛不中尺度者

金海陵正隆六年四月詔汝州百五十里內州縣量遣商

賈赴温湯置市

章宗明昌元年七月詔罷西北路蝦蟆山市場 泰和六

年正月設點檢司車駕所至仍令百姓市易

宣宗興定三年正月議行均輸又勅和市邊城軍輸毋至

抑配貧民

元

世祖中統四年正月詔立燕京平准庫以均平物價通利

鈔法 至元元年正月立諸路平准庫 二年三月括

民間南貨官給其直 十三年正月立回易庫于諸路

凡十有一掌市易幣帛諸物 二月勅上都和顧和買

並依大都 十六年十月張融訴西京軍戶和買和顧

有司匿所給價鈔計萬八千錠官吏坐罪以融為侍衛

軍 是時和買木綿布限嚴且數崇安尹楊靚區畫有方不屬于民 十八年九月勅新安縣民復和顧和買 十九年九月命軍站戶出錢助民和顧和買 二十年十月立和林平准庫 罷雲南造買金箔規措所 二十八年二月汪總帥言近制和顧和買不及軍家今一切與民同詔自今軍勿輸 三十年詔出征軍毋以和顧和買煩其家

成宗元貞元年十二月詔大都路和顧和買及一切差役以諸色戶與民均當 大德二年十二月詔和市價值隨給其主違者罪之 七年三月追收元降除免和顧和市壘書

仁宗皇慶元年禁諸王駙馬經過州郡不得非理需索庶

和顧和買隨即給價毋困吾民 延祐七年時英宗未改元鉄

木迭兒言和市織幣薄惡由董事者不謹請免右丞高

昉等官仍令郡縣更造徵其元直不許

泰定帝泰定二年四月和市牝馬有駒者萬匹

文宗天曆元年九月命有司和市粟豆十六萬五千石分

給居庸等關軍馬

順帝至正十四年二月詔和買馬于北邊以供軍用凡有

馬之家十匹內和買二匹每匹給鈔一十錠

皇明

太祖洪武二年令凡內外軍民官司並不得指以和顧和

買擾害於民如果官司缺用之物照依時值對物兩平
收買或客商到來中買物貨並仰隨即給價如或減駁
價直及不即給價者從監察御史按察司體察或赴上
司陳告犯人以不應治罪 又定時估仰府州縣行屬
務要每月初旬取勘諸物時估逐一覆實依期開報毋
致高擡少估虧官損民上司收買一應物料仰本府州
縣照依按月時估兩平收買隨即給價毋致虧損於民
及縱令吏胥里甲舖戶人等因而尅落作弊 二十六
年定凡民間市肆買賣一應貨物價值須從州縣親臨
衙門按月從實申報合于上司遇有買辦軍需等項以
憑照價收買

宣宗宣德八年令各處買辦諸色物料聽差殷實大戶齎
價於出產地方收買供用 九年令應天府買辦物料
於都稅司支鈔給主

英宗正統二年令買辦物料該部委官一員會同府縣委
官拘集該行舖戶估計時價關出官錢仍委御史一員
會同給與舖戶收買送納 三年令買辦賞賜達官器
皿及鄉試會試合用紙劄等物并遇有買辦之類皆估
計價鈔數目照舊具奏限一月內赴庫領散不許過違
如官司暫用筯卓器皿係買辦者用畢送工部廠計收
以待再用 八年令 朝廷所用物件免有司買辦查
出產地方於存留糧內折收解京沿途官司應付船隻

脚力南直隸府并山東者送北京該衙門收 廣東
浙江湖廣江西四川者送南京衙門收歲終具奏 九
年令歲用果品厨料照舊支領官錢派買不許於存留
糧內折徵 又令凡遇造作等項急用物料止於官庫
關用有不敷者方許具奏先給官價派買

景皇帝景泰六年令京城內不係常久開張舖面及小本
出攤提買等項買賣俱免買辦

世宗嘉靖三十一年議准自本年爲始每半年一次將供
用等庫并各倉場一應合用糧草等項山東河南二道
管糧官員查訪行令宛大二縣造冊六本空立前件一
本送巡青科道二本送巡視庫藏科道一本送巡視

城御史一本送該司與九門委官公同參酌如先估與
市價相合不必更易其間物料時有貴賤價有低昂應
增應減務要酌量時宜上半年不過正月下半年不過
七月務依期照例會估 三十二年議准行十三布政
司南北直隸所屬凡遇會派年例錢糧務要以京估爲
準有餘者減不足者增

今上萬曆九年令九門塩法委官會同科道將各倉場料
草及各庫物料價銀參酌往年近日舊冊量加增減著
爲定規以後非物價大相懸絕不得再行會估

權量

太祖洪武元年令兵馬司并管市司二日一次較勘街市

斛斗秤尺并依時估定其物價在外府州各城門兵馬一體兼領市司二年令凡斛斗稱尺司農司照依中書省原降鈇斗鈇升較定則樣製造發直隸府州及呈中書省依樣製造較勘相同發下所屬府州各府正官提調依法製造較勘付與各州縣倉庫收支行用其牙行市舖之家須要赴官印烙鄉村人民所用斛斗秤尺與官降相同許令行使二十六年定凡天下官民人等行使斛斗秤尺已有一定法則頒行各司府州縣收掌務要如式成造較勘相同印烙降民間行使其在京倉庫等處合用斛斗秤尺等項本部較勘印烙發行憲宗成化五年令京城內外并順天府所屬地方諸色貨

物行人依式置造斛斗秤尺天平等件赴官較勘印烙方許行使違者如律治罪兩隣知情扶同隱匿互相借用者事發一體究治

武宗正德元年議准工部行寶源局如法製造好銅法子一樣三十二副每副大小二十箇俱鑿正德元年寶源局造字號送部印封發浙江等布政司及各運司并南直隸府州各依式樣支給官錢一體改造頒降用使世宗嘉靖二年議准凡城市鄉村諸色牙行及船埠頭並選有抵業人戶充應官給印信文簿附寫客商船戶住貫姓名路引字號物貨數目每月赴官查照私充者杖所得牙錢入官官牙埠頭容隱者答革役凡諸物行

人評估物價或貴或賤令價不平者計所增減之價坐
贓論入已者准竊盜論免刺。凡買賣諸物兩不和同
而把持行市專取其利及販鬻之徒通同牙行共為姦
計賣物以賤為貴買物以貴為賤者杖。若見人有所
買賣在傍高下比價以相惑亂而取利者笞。凡私造
斛斗秤尺不平在市行使及將官降斛斗秤尺作弊增
減者杖工匠同罪。若官降不如法者杖提調官失於
勘者減一等知情與同罪。其在市行使斛斗秤尺雖
平而不經官司校勘印烙者笞。若倉庫官吏私自增
減官降斛斗秤尺收支官物而不平者杖以所增減物
計贓重者坐贓論因而得物入已者以監守自盜論。

匠論校監臨官知而不舉者與犯人同罪失覺察者減
三等罪止杖一百。凡造器用之物不牢固真實及絹
布之屬紕薄短狹而賣者各笞五十其物入官。

穆宗隆慶四年六月戶部條議恤商事宜。一定時估言
物價與時低昂而錢糧因時辦納若先期估計則貴賤
無憑或倉場遠近僦費多寡遙度懸斷豈盡合宜此後
九門鹽法委官與十三司掌印官及巡青科道估價上
半年定於五月下半年定於八月俱以十六日為期務
在隨時估價不得執一其內庫監局召賣物料價亦倣
此。一議給價將御馬三倉壩上等馬房錢糧原屬山
東河南督理京道者俱改於太倉關各草場料草原派

數少者給以全價數多者給以三分之一完日補給皆以時估爲率其兩省督糧官既無關領之擾則催督宜嚴如有怠玩者劾治一嚴禁革各庫監局及牛羊象馬房等倉西安等門典守官吏有索求抑勒者悉治其罪一裁冗費量減各倉場草束斤數及脚夫庫秤之冗食者一酌坐買凡料草數多一時難以猝辦者量於秋冬二孟之月坐買不得仍前全坐致費高價陳草悉令發賣或如數補放未給價者速給之一公僉報各商果貧困不能供役者具通狀告補轉行巡青衙門驗實方許舉報富戶更代疏入上悉從之

今上萬曆元年令九門塩法委官會同科道將各倉場料草及各庫物料價銀參酌往年近日舊冊量加增減著爲定規以後非物價大小懸絕不得再行會估二十九年工科給事中奏舖商向年題請編審之日舊商報之臣等核之報之不實則失在舊商核之不真則失在臣等若豪猾之徒公以賄免則罪在奸商公報新商查雍劉欽等二十八名如查雍等十三名郡中最稱富厚劉欽等十五名亦皆中人之產可協工役者雍等乃倚恃錢神擅通關節倖免止遺劉欽等十五名以數人之力支煩劇之役在雍等享富臧厚積之饒在欽等遭傾家蕩產之困國家之工程自奸商誤之象魏之法紀自奸商撓之若不嚴行禁止痛加罪治竊恐再報

之商踵雍等之故智做已售之奸謀妄肆攀援矣伏乞
勅下該部今次補報新商俱勒限三日內投遞認狀
供役其有遷延違悞賄托求退者許該部并臣叅送法
司從重究罪各衙門亦毋得借稱官校匠役名色曲爲
代題如此則通都有斧鉞之嚴舖商無偏累之苦而臣
等亦可以免公役耽延之慮矣

市舶互市

宋

孝宗乾道三年罷兩浙市舶司以言者論兩路市舶所得
不過一萬三千餘貫而一司官吏請給乃過於所收故
也淳熙六年趙雍等奏光州復置中渡榷場官御前

恐有曾經在榷場幹事之人可以差充監官庶可檢察
禁物不令過界上曰御前自來不曾差人在淮上買物
如淮白比果之屬毫髮不曾買淮白魚也

寧宗嘉定中泉州番舶畏苦征至者歲不三四真德秀知
泉州首禁之至者驟增至三十六艘

理宗景定四年七月置榷場於樊城

按宋史劉整言于蒙古曰南人惟恃呂文德耳然可以
利誘也請遣人以玉帶餽之求置榷場於襄陽城外蒙
古從之王鶚請于文德文德許之蒙古使曰南人無信
安豐等處榷場每爲盜所掠願築土墻以護貨物文德
不許或謂文德曰榷場成我之利且可因以通好文德

爲請於朝開榷場於樊城外築土墻於鹿門山外通互
市內築堡壁蒙古又築堡於白鶴由是敵有所守以遏
南北之援時出兵哨掠襄樊外兵威益熾文德弟文煥
知爲蒙古所賣以書諫止文德始悟然已無及惟自咎
耳

遼

太宗時南雍州高昌渤海立互市以通南宋西北諸部高
麗之貨故女直以金帛布蜜蠟諸藥材及鉄驪靺鞨于
厥等部以蛤珠青鼠貂鼠膠魚之皮牛羊駝馬毳罽等
物來易于遼者道路繼屬 會同二年五月禁南宋鬻
牝羊出境

聖宗統和二十二年與宋通好復置榷場于振武軍 二
十三年北院大王耶律室魯以俸羊多缺部人貧乏請
以羸老之羊及皮毛易南中之絹上下爲便

興宗重熙八年正月禁朔州易羊于宋 十一年六月禁
氈銀鬻入宋

金

太祖時于西北招討司之燕子城北羊城之間置榷場以
易北方畜牧

熙宗皇統元年正月夏國請置榷場許之 二年五月許
宋人之請各置榷場于兩界以通互市 九月命壽州
鄧州鳳翔府等處皆置

海陵正隆四年正月罷鳳翔唐鄧穎蔡鞏洮膠西諸處權
場而專置于泗州尋攻宋亦罷之五年八月命權場
起赴南京

世宗大定二年四月夏使乞互市從之三年市馬於夏
國權場四年以尚書省奏復置泗壽蔡唐鄧穎密鳳
翔秦鞏洮諸場七年禁秦州場不得賣米麵及羊豕
之脂可作軍器之物入外界十七年二月諭宰臣曰
宋人喜生事背盟或與大賈交通恐枉害生靈不可不
備其陝西沿邊權場可止留一處餘悉罷之今所司嚴
察奸細二十一年正月夏國王李仁孝上表乞復置
權場以保安蘭州無所產而且稅少惟綏德爲要地可

復設市命省臣議之宰臣以陝西邊民因緣爲奸東勝
可依舊設陝西者並罷之上曰東勝與陝西道路隔絕
貿易不通其令環州置一場尋令綏德州復置一場仍
許就館市易十二月禁壽州權場受分例分例者商
人贊見場
幣也

章宗明昌二年七月尚書省以泗州權場自前關防不嚴
遂奏定從大定五年制官爲增脩舍屋倍設闌禁委場
官及提控所拘權以提刑司舉察惟東勝靜慶州來遠
軍者仍舊餘皆修完之是歲諭有司夏國使可令館
內貿易一日尚書省言舊制許貿易三日從之泗州
場大定間歲獲五萬四千四百六十七貫承安元年增

爲十萬七千八百九十三貫六百五十三文所須雜物
泗州場歲供進新茶千勝荔枝五百斤員眼五百斤盧
橘六千斤橄欖五百斤芭蕉乾三百箇蘇木千斤溫柑
七千箇橘子八千箇沙糖三百斤生薑六百斤梔子九
十秤犀象丹砂之類不與焉宋亦歲得課四萬三千貫
秦州非子城大定間歲獲三萬三千六百五十六貫
承安元年歲獲十二萬二千九十九貫 承安二年九
月以夏使朝辭詔荅許復保安蘭州權場初金主雍謂
夏國以珠玉易我絲帛是以無用易我有用命罷之至
是仍許復 三年九月行樞密院奏斜出等告開權場
自今年十一月貿易尋定制隨路權場若以見錢入

界與外人交易者徒五年三斤以上死 是年宋界諸
場以攻宋皆罷 泰和八年八月以與宋和宋人請如
舊置權場遂復置于唐鄧壽泗息州及秦鳳之地

宣宗貞祐二年陝西安撫副使烏古論交州復開設秦州
權場歲所獲以十數萬計完顏弼奏其擅置宣宗曰朕
固許其從宜也 三年七月議欲聽權場互市用銀而
量數稅之上曰如此是公使銀入外界也平章盡忠權
叅知政事德升曰賞賜之用莫如銀絹而府庫不足以
給之互市雖有禁而私易者自如若稅之則歛不及民
而用可足平章高琪曰小人敢犯法不行爾况許之乎
今軍未息而產銀之地皆在外界不禁則公私指日罄

續文獻通考卷之三十一
一五
矣上曰當詳計之 興定二年四月完顏素蘭請宣諭
高麗互市從之

元

世祖中統元年置互市于漣水軍禁私商不得越境犯者
死 二年於高麗鴨綠江西立互市至明年正月罷高
麗互市 至元元年罷南邊互市 十三年定江南凡
隣海諸郡與蕃國往返互易舶貨者其貨以十分取一
粗者十五分取一以市舶官主之其發舶回帆必驗其
所至之地及所易之物給以公文爲之期日大抵皆因
宋舊制而爲之法也又制大舶給公驗舢舨給公憑每大
船一帶柴米船八櫓船各一驗憑隨船而行或有驗無

憑及數外夾帶即同私販犯人杖一百船物並沒官內
一半付告人充賞公驗批寫物貨不實及變賣滲泄作
弊同漏船法財物沒官舶司官吏斷罪不叙 十四年
四月置權場于碇門黎州與吐蕃貿易 十二月立市
舶司于泉州 又立市舶司三千慶元上海澈浦以福
建安撫使楊發領之每歲招集舶商于蕃邦博易珠翠
香貨等物及次年回帆依例抽解然後聽其貨賣時客
船自泉福販土產之物者其所徵亦與蕃貨等上海市
舶司提控王楠以爲言於是定雙抽單抽之法雙抽者
番貨也單抽者土貨也 十五年八月詔行中書省蒲
壽庚等曰諸蕃國列居東南島嶼者皆有慕義之心可

因番舶諸人宣布朕意誠能來朝朕將寵禮之其往來互市各從所欲 十一月詔諭沿海官司通日本國人市舶 十八年九月詔商賈市舶物貨已經泉州抽分者諸處貿易止令輸稅 十九年用耿左丞言以鈔易銅錢令市舶司以錢易海外金珠諸物仍聽船戶通販抽分 二十年六月定市舶抽分例舶貨精者取十之一粗者十之五 十月忙古碑言舶商皆以金銀易香木於是下令禁之惟鐵不禁 二十一年設市舶都轉運司于泉杭二州官自具船給本運人入番貿易諸貨其所獲之息以十分爲率官取其七人得其三凡權勢之家皆不得用已錢入番爲賈犯者罪之仍籍其家產

之半其諸番客旅就官船買賣者依例抽之官吏奉行不虔者罪 二十二年併福建市舶司入鹽運司改曰都轉運司領福建漳泉鹽貨市舶 二十三年括諸路馬凡色目人三取其一漢民悉入官敢匿與互市者罪之 正月禁賫金銀銅錢越海互市違者罪之 二十四年三月忻都奏發新鈔十一萬六百錠銀千五百九十三錠金百兩付江南各省與民互市 二十五年禁廣州官民毋得運米至占城諸番出糶違者罪之 二十六年沙不丁上言市舶司歲輸珠四百斤金三千四百兩詔貯之以待貧乏者 江西宣慰使胡頤孫援沙不丁例請至元鈔千錠爲行泉府司歲輸珍異物爲息

從之 二十九年六月日本來互市 十一月中書省
定抽分之法及漏稅之制凡商賈販泉福等處已抽之
物于本省有市舶之地賣者細色於二十五分之中取
一粗色于三十分之中取一免其輸稅其就市舶司買
者止于賣處收稅而不再抽漏船物貨依例斷沒 初
日本舟至四明求互市舟中甲仗皆具是年冬恐有異
圖詔立都元帥府以防海道 三十年立海北海南博
易提舉司稅依市舶司例 定市舶抽分雜禁凡二十
一條其要者泉州澈浦温州廣東杭州慶元市舶司凡
七所獨泉州于抽分之外又取三十一分之一以為稅
令諸處悉依泉州例取之仍以温州市舶司并入慶元

杭州市舶司并入稅務凡金銀銅鐵男女並不許私販
入番行省行泉府司市舶司官每年于回帆之日皆前
期至抽解之所待船舶之至先封其堵以次抽分違期
及作弊者罪之從行大司農燕公楠翰林學士承旨留
夢炎言也 三十一年時成宗已即位詔有司勿拘海舶聽其
自便尋又以船舶至岸隱漏物貨者多命就海中逆而
閱之

成宗元貞二年八月禁舶商毋以金銀過海諸使海外國
者不得為商

仁宗延祐元年立市舶提舉司仍禁人下番須江浙省給
牒以往迴帆之日細物十分抽二粗物十五分抽二私



往者沒其物 七年以下番之人將絲銀細物易于外國乃罷市舶司提舉司禁賈人下番貨

英宗至治二年復置市舶提舉司于泉州慶元廣東三路聽海商貿易歸徵其稅特禁子女金銀絲綿下番餘並無沮

泰定帝泰定元年諸海舶至者止命行省抽分 三年官中買寶貨命省臣依累朝呈獻例給價毋得勒減稽遲以病商人

文宗天曆元年以官中買寶貨蠹耗國財詔加禁止凡上獻者以違制論 十一月詔日本國船商至福建博易者江浙行省選廉吏征其稅

順帝元統二年中書省臣請發兩艘船下海通番為皇后營利

皇明

吳淵頴論市舶乃引辛毗對魏文帝之言曰罷我互市任彼貿易中國免徼利之名外夷知効順之實計莫便於此惟其商道不通而利之所在人必趨之不免巧生計較商轉而為寇商道既通則寇復轉而為商彼其既犯國禁思圖苟安因啗引勢家惹起奸圖按 國初禁海之例始因倭夷違諭而來繼恨林賢巨燭之變故欲閉絕之非以通商之不便也惟其不通商而止通貢所以正德年間各道爭貢以規市利在彼國則強請勘合

倭王遂不能制在中國則有宗設宋素卿之禍而漳寧惡少甘蹈負固而肆橫行推厥所原各有行商之意而終貽地方之害耳

按祖訓曰日本限山隔海得其地不足以供給得其民不足以使令不許興兵致伐然夷中百貨皆中國不可缺者夷必欲售中國必欲得之以故祖訓雖嚴而三市船司如故市舶初設太倉黃渡尋改設于福建浙江廣東七年罷未幾復設蓋東北夷有馬市西夷有茶市江南海夷有市舶者皆所以通華夷之情遷有無之利減戍守之費又以禁海賈抑奸商使利權在上自罷市舶而利孔在下奸豪外交內訐海上無寧日矣

大明律凡泛海客商船舶到岸即將貨物盡實報官抽分若停塌沿港土商牙儈之家不報者杖雖供報而不盡者罪亦如之物貨並入官停藏之人同罪告獲者官給賞銀二十兩

太祖洪武四年諭福建行省占城海舶貨物皆免征以示懷柔之意

成祖永樂元年十月西洋刺泥國回哈只馬哈沒奇等來朝因附載胡椒與民互市有司請徵其稅上曰商稅者國家抑逐末之民豈以為利今夷人慕義遠來乃侵其利所得幾何而虧辱大體多矣不聽

英宗正統八年也先阿魯骨貢馬互市中官王振裁其馬

價也先遂大舉入掠大同宣府振挾 駕親征遂致北狩天順以後互市遂絕彼以貢馬爲名邊將啖以厚利 羈縻而已

憲宗成化十四年令遼東馬市許海西并朵顏三衛夷人賣買開原每月初一日至初五日十六日至二十日開二次各夷止將馬匹并土產貨物赴彼處委官驗放入市許齊有貨物者與彼兩平交易不許通事交易人等將各夷欺負愚弄虧少馬價及偷盜貨物亦不許撥置夷人指以失物爲由扶同詐騙財物分用敢有擅放夷人入城及縱容官軍人等無貨者任意入市有貨者在內過宿規取市利透漏邊情事發俱發兩廣烟瘴地面

文軍遇赦不宥 十七年題准廣寧開原二處俱開馬市其通事三年一換

世宗嘉靖二十六年倭寇百艘久泊寧台數千人登岸焚劫巡撫朱統訪知番船主大姓家番貨皆以虛值轉鬻牟利而值不時給以是構亂乃嚴海禁毀餘艘而請鑄暴貴官大姓戒諭之不報 二十八年秋七月朱統又言長嶼諸澳大俠林恭等勾引夷舟作亂而巨奸關通主匿牟利因爲嚮道躡我海濱宜正典刑刑部覆奏真僞未審宜俟覈報臺臣劾統注措乖方顯殺啓釁 上令統還籍聽勘而訊海防諸臣 時俺答入寇 京師震駭仇鸞上言北虜生齒日繁毫髮仰給中國周尚文

不得已貨啖之邊事稍寧夫通貢固不可與其邊臣交
 通獲利孰若 詔許欵塞互市恩出于上乎疏下兵部
 議聞 三十年鸞密遣家丁時義結俺荅義子脫使貢
 馬互市俺酋利貨幣譯書送總督蘇佑佑以聞鸞曰未
 樂成化中嘗設馬市於遼東待海西女直及朵顏三衛
 今虜求開馬市留使為質縛叛示信似宜暫行議入
 帝問相嵩云一年開二市亦宜乃遣史道往大同理互
 市 兵部員外楊繼盛疏曰今議開馬市其不可者有
 十其謬有五夫互市和議之美名也和則上無以解
 列聖之耻下無以洩百姓之怨而忘天下之大義一
 屢下 命北伐人思自奮一旦講和失天下之大信二

堂堂 天朝與犬羊市損國家之大威三 天下豪
 傑盡思決一死戰一和而灰豪傑効用之志四 將士
 偷安懈天下經武之心五 宣大吏民勾引牽連開邊
 方交通之徑六 天下歲荒民困人心思亂國威日玩
 人思效尤起百姓不靖之漸七 張武經年竟成虛言
 長胡虜輕我之心八 我不能制彼而反為所弄墮胡
 虜狡猾之計九 互市不已我財日匱忘天下根本之
 計十 或謂外開馬市而陰修武備夫果欲修武何藉
 於和犬羊無厭敗盟反掌耳謬一 或謂我方乏馬虜
 肯以良馬畀我乎和果可必安事戰馬謬二 或謂互
 市之後漸許通貢可為末利不知通貢徒手取利不如

互市之有值且亦何暇計乎久耶謬三 或謂虜既和
我當不失信不知醜類日衆安能盡厭其欲得和者喜
則失者必怒矣謬四 或謂征討禍慘互市費微不知
損國威養寇亂壞天下大計者其禍甚於戰謬五 疏
聞 帝以阻撓搖惑謫狄道典史 三十一年虜以市
利薄入寇大同仇鸞倚通市不爲戍守備大同總兵徐
仁巡撫何思禁軍兵拒虜諸將擁兵拒虜獨指揮王恭
戰死 代府饒陽王上狀 上逮徐仁等褫其職罷史
道 制復言開馬市者死著爲令 三十五年倭寇大
掠福建浙直胡宗憲遣生員蔣洲胡可願使倭宣諭還
報倭夷志欲通貢市本兵力議不可乃止 四十四年

九月巡撫浙江劉畿言寧波故設市舶以通貿遷屬以
近海奸民規利起釁爰議裁革今人情狃于近利輒欲
議復不知沿海港多兵少防範爲艱此釁一開島夷哨
聚禍不可測市舶之議遂寢

穆宗隆慶五年二月兵部請以王崇古馬市八議下廷臣
會議可否從之 三月兵部復請以崇古議俺荅王號
餘酋授都督指揮千戶職銜歲貢期已過二月聽於三
四月後一行以慰諸夷之望互市之時先定入市馬匹
之數以杜爭端其貢使不得至京鐵鍋等物不得闌出
又言套虜事體與宣大不同宜令陝西督撫更議可
否 上允行之 九月宣大總督王崇古報北虜互市

事竣大同得勝堡自五月二十八日至六月十四日官市順義王俺荅部馬千三百七十四匹價一萬五百四十五兩私市馬騾驢牛羊六千撫賞費九百八十一兩新平堡七月初三至十四日官市黃台吉擺腰兀慎部馬七百二十六匹價四千二百五十三兩私市馬羸牛羊三千撫賞費五百六十一兩宣府張家口堡六月十三至二十六日官市昆都力哈永郡卜大成部馬千九百九十三匹價萬五千二百七十七兩私市馬羸牛羊四千撫賞千五百兩市皆無擾疏入邊臣遷秩頒賞有差今上萬曆二十七年十一月宣府巡撫王象乾奏事竣鎮城張家口易買過酋把都白洪大永郡卜大成台吉等

夷馬一萬七千六百六十三匹用過貨價銀十一萬三千九十三兩八錢零撫賞用過銀四萬四千六百九十五兩九錢零該年仍有各虜酋未賣馬價未領撫賞約筭該畱銀三萬三千七兩三錢零如後各夷至市求討照數補給如不復討銀貨聽挨年支用實比原定市賞額數節省銀四萬六千二百有奇 二十八年六月遼東巡撫李植奏虜人挾市非誠乞亟會議以決大計其畧謂遼左馬市創設有年諸撫賞貨物自二十二年以前共止費銀二千四百餘兩至二十三年委馬政官俞方策兼管或聽夷酋重名詭名或比舊例加倍甚有增至三四倍者二十四年增至四千五百餘兩二十五年

增至六千四百餘兩二十六年前撫臣張思忠察其弊端稽查裁抑仍用過二千七百餘兩虜反要挾宣大之賞張思忠不勝其憤具疏請革馬市遂罷此廣寧馬市因革之大略也又州木市自前撫臣李化龍題小反青欲在又州大康堡順河運木進邊賣買李化龍酌量題請許撫臣止酒食爲犒行之三年無譁後因將領多有短值勒指夷木者夷人恨之焚木而去不復再來木市遂罷此又州木市興廢之大較也二市之設皆一時羈縻之術與宣大和款不同順之則撫叛之則罷此夷方市彼夷即搶無歲無之自二十二年至二十六年犯石屯城犯廣寧鎮開原靖安犯又州慶雲犯兩河犯瀋陽

犯東勝堡犯中右所損傷贖兵四五年間未嘗不開市未嘗不大搶往事可徵矣今三月二十日賊五百餘騎從大鎮堡二十一日四百餘騎從西平四月初一日五百餘騎從黑庄巢等堡各入犯虜既背約分搶且不休何忠順之有而欲與之市撫賞之耶二十九年九月延綏候代巡撫王見賓奏套虜告囊諸酋求通馬市上命九卿科道會議兵科給事中桂有根奏在內遙度莫若行新任巡撫計議上允行之十二月戶部覆劄遼總督萬世德奏夷人輸誠求撫奉旨朶顏各夷馬木二市准開復撫賞照二十三年例行寧前木市亦聽便宜開復仍督道將嚴脩戰守不許從旁阻撓牽制奴

那二酋補進雙貢也并准行

按今之論禦寇者一則曰市舶當開一則曰市舶不當開愚以為皆非也何也貢舶與市舶一事也分而言之則非矣市舶與商舶二事也合而言之則非矣商舶與寇舶初本二事中變為一今復分為二事混而言之亦非矣何言乎一也凡外夷貢者我朝皆設市舶司以領之在廣東者專為占城暹羅諸番而設在福建者專為琉球而設在浙江者專為日本而設其來也許帶方物官設牙行與民貿易謂之互市是有貢舶即有互市非入貢即不許其互市明矣西番琉球從來未嘗寇邊其通貢有不待言者日本狡詐叛服不常故獨限其期

為十年人為二百舟為二隻後雖寬假其數而十年之期未始改也今若單言市舶當開而不論其是期非期是貢非貢則釐貢與互市為二不必俟貢而常可以來互市矣紊祖宗之典章可乎哉何言乎二也貢舶者王法之所許市舶之所司乃貿易之公也海商者王法之所不許市舶之所不經乃貿易之私也日本原無商舶商舶乃西洋原貢諸夷載貨泊廣東之私灣官稅而貿易之既而欲避抽稅省陸運福人導之改泊海滄月港浙人又導之改泊雙嶼每歲夏季而來望冬而去可與貢舶相混乎何言乎二而一一而二也海商常恐遇寇海寇惟恐其不遇商如陰陽晝夜判然相反為商者

曷常有為寇之念哉自甲申歲凶雙嶼貨壅而日本貢使適至海商遂販貨以隨售倭以自防官司禁之弗得西洋船原由私灣東洋船遍布海洋而向之商船悉變而為寇舶矣然倭人有貧有富有淑有慝富者與福人潜通改聚南灣至今未已日本夷商惟以銀置貨非若西番之載貨交易也福人利其值希其抽稅買火底船至外海貼造而往渡之雖驅之寇不欲也此固無待於市舶之開而其互市未嘗不行者也貧者剽掠肆志每歲犯邊雖令其互市彼固無貨也亦不欲也此非開市舶之所能止而亦不當反錫之名目者也故不知者謂倭寇之患起於市舶不開市舶不開由於入貢不許許其入貢通其市舶中外得利寇志泯矣其知者西

之以為不然夫貢者夷王之所遣有定期有金葉勘合表文為驗使其來也以時其驗也無偽我國家未嘗不許也貢未嘗不許則市舶未嘗不通何開之有使其來無定時驗無左証乃假入貢之名為入寇之計雖欲許得乎貢既不可許市舶獨可開乎或謂日本國王號令不行山口豐後互相雄噬金葉勘合燬於兵火矣如責其期拘其驗則彼終無繇貢而市舶終無繇開矣須弘包荒之量昭無外之仁可也又不然夫貢而無驗招寇之囚也貢而無期弛備之階也緩其期稽其驗隄防猶難矧可頻貢而勿驗哉大抵善施恩者施之於威伸之後則人知恩今寇犯順數年雖屢大捷而禍猶未殄

倭未知畏也此須肅清之後俟其請罪求貢或如永樂
初擒斬對馬臺岐故事夫然後許之則撫下之仁事上
之義兩得之矣

糴

宋

孝宗隆興元年詔福建提舉司具到本路見在常平米九
萬九千二百餘石義倉米二十九萬五千六百餘石令
本司契勘如無陳腐不須更行收糴從中書門下省請
也 二年詔司農少卿陳良弼往浙東點檢常平等倉
良弼言比點檢七州常平倉其間失陷借支壞爛失收
米麥共二十七萬六千二十餘石并常平錢一萬四千

四十餘貫乞委提舉官徧詣所屬剗刷餘省錢米償納
如所償未足俟收納秋苗日盡償從之 戶部言諸路
節次承降指揮和糴先拋降下未糴見錢銀并兩浙運
司合椿今年歲額糴本移用錢及諸路常平剩下糴本
等錢共二百萬貫令行在并隆興建康鎮江府衡州
置場收糴米斛共一百萬石依舊作常平椿管緣逐路
提舉司循習住滯不催督錢糧因而過時有悞收糴欲
將所科糴錢數劄下逐路提舉常平官兩浙運司日下
計置盡數赴逐處糴場交納仍各具已催起錢數申尚
書省從之 乾道元年臣寮言去歲江西湖南和糴其
弊非一不問家之有無例以稅錢均敷此一弊也州縣

各以水脚耗折爲名收耗米什之二三此二弊也公吏
卧脚百方乞覓量米則有使用請錢則有糜費此三弊
也以關引償價許之還以輸官然所在往往折價至輸
官則不肯受此四弊也詔逐路委漕臣并提舉往來巡
按務盡和糴之意以革四弊如安坐不恤奉行簡慢必
罰無赦 二年王暉等言和糴之弊害及于民爲守令
罪朝廷拋降有定數而州縣額外倍科朝廷降糴本于
州縣而州縣十不支一二乞令州縣各置場申嚴條法
從之 三年劉珙自汝南召還初入見論和糴之弊湖
南江西爲尤甚朝廷常下蠲免之令遠方之民舉手相
賀曾未數月又復分拋州縣既乏緡錢將何置場收糴

民間關引無用則與白著一同倘能革綱運之弊自可
減和糴之數望詔止之上嘉納 五年臣寮言陛下臨
御之初約束州縣受納苗米多收加耗法禁甚嚴而近
年以來所收增多逮朝廷拋降和糴却以出剩之數虛
作糴到所得價錢盡資妄用乞申嚴州縣杜絕弊倖庶
寬民力從之 六年新權發遣衢州胡堅常進對奏廣
糴常平上曰若一州得二十萬石常平米雖有水旱不
足憂矣 八年戶部楊倓奏義倉在法夏秋正稅每一
斗別納五合即正稅不及一斗免納應豐熟一縣九分
已上即納一升惟充賑給不許他用今諸路州縣常平
義倉米斛不少年來雖間有災傷去處支給不多訪聞

皆是擅行侵用從來未會稽攷乞下諸路常平官限半
月委逐州主管官取索五年的實放支數目仍開說逐
年有無災傷檢及取給過若干并見在之數實計若干
目今在甚處椿管結具保明文帳稽考施行從之 淳
熙二年照諸路常平司每歲于秋成之際取見所部郡
縣豐歉各及幾分如有合賑糶賑給去處即仰約度所
用及見管米斛若干或有關少合如何措置移運並預
期審度施行仍須 于九月初旬條具聞奏 四年范
成大奏關外麥熟倍于常年緣去歲朝廷免和糶一年
民力稍紓得以從事于耕作故其效如此上曰免和糶一
年民間便已如此乃知民力不可以重困也王淮去

年止免關外今從季繁之請盡免蜀中和糶一年爲惠
尤廣 尚書省言信州常平義倉米元申帳狀管九萬
三千餘石今次提舉司申有六萬八千餘石及至盤糧
止得一萬二千九百餘石皆是虛數提舉官李唐到任
已及二年並不檢察是致闕米有誤賑濟知州趙師嚴
通判李桐係乾道三年到任之人所由帳狀隱蔽虛妄
詔李唐特降兩官放罷趙師嚴李桐各降兩官不得與
堂除 詔平江嘉興府安吉州禁販米下海其販至臨
安府者毋得遏糴尋詔趙與權提領其事一應浙東州
縣并許浦金山水軍一體遵守違者權聽按察 六年
進呈荆鄂副都統郭果奏唐鄧諸處自來積穀不多襄

陽自漢江以北四向美田民間多有畜積欲密行措置於秋收之際收儲以備緩急上曰于秋成之際廣行收糴合用倉廩及收貯去處仰公共相度措置申奏是年上曰義倉米專備水旱以濟民今連歲豐稔常平米正當趁時收糴可嚴行以先降指揮催諸路以常平錢盡數糴米時諸路未有申到處故也七年三省奏去歲豐稔今歲米賤所在和糴告辦倉廩盈溢其江東路諸郡上供米初令就近赴金陵鎮江倉今兩處守臣皆云無可盛貯乞依舊發赴行在豐儲西倉八年趙鼎奏今雖米賤猶慮其無錢可糴欲行下去歲旱傷州縣於義倉米內支給至三月終止上曰正合朕意遂詔

歲江浙湖北淮西路郡縣間有旱傷去處已令多出椿積等米廣行賑糴今雖聞諸路米價低昂不平其鰥寡孤獨貧乏不能自存之人無錢收糴深可矜憫令州縣鎮寨鄉村抄籍姓名將義倉米賑濟務要實惠及民如州縣奉行不虔仰本路漕臣及提舉常平官覺察以聞重寘憲典十二年勘會諸路州縣義倉米斛在法合隨正苗交納唯乞賑糴今收成在即當議指揮詔諸路提舉常平官各行下所部州軍仰隨鄉分豐歉依條收納不得侵隱他用候歲終具舊管新收數目申尚書省十二年臣寮言伏見淮上州軍逐處皆有椿管米斛建康鎮江大軍屯駐又有總司錢糧惟太平府采石鎮沿

江要害去處去歲民間艱食州郡必無儲備聞淮上去秋成熟淮人多有載米入浙中出糶不行今秋成在近望先次支降本錢付總領所及時和糶詔趙汝誼于建康務場見椿管會子先次取撥一十五萬貫委官就采石倉措置依在市時直收糶椿管是年令提領封椿庫所支降會子一十五萬六千二百六十九貫付淮東總領所三十二萬六千三百一十二貫付淮西總領所三十萬貫行湖廣總領所並充今年和糶椿管米本錢支用又詔封椿庫支降會子五十萬貫委浙西提舉羅點和糶米二十萬石淮東總領所取撥鎮江府見椿管會子二十九萬貫湖廣總領所取撥鄂州并大軍庫見

對兌不
擇其積之
在米

椿管會子共三十萬貫並就豐熟去處置場浙西提舉就平江府置場招糶堪好米斛仍一面取見實值開具申尚書省毋令稍有科抑十三年詔沒官田產合拘收租課入常平違者科罪臣寮請約束諸路納義倉米上曰亦不須得若有違戾自當行遣今後更不降指揮十五年司農等言臣寮劄子切見豐儲倉初為額一百五十萬石不為不多然積之既久寧免朽腐異時緩急必失措擬乞下戶部司農等相度以每歲諸州合解納行在米數若干及諸處坐倉收糶若干預行會計以俟對兌不盡之數如常平法許其于陳新未接之時擇其積之久而盡數出糶俟秋成日盡數補糶則是五

十萬
光宗時

並然

十萬石之額亦無銷耗此亦廣儲蓄之策也從之

光宗時彭龜年乞權住湖北和糴疏曰去年朝廷以淮浙
並饑江湖小熟遂下和糴之令嚴遏糴之禁惠甚渥也
蘇州縣亟欲集事未免敷糴于民商賈競起趨利又復
爭糴于下江淮兩浙司倉以至總司戎帥皆散遣官吏
多齎錢物四處收糴其所差人爭先趨辦迭增價直以
相傾奪米價既長害及細民細民日要添錢糴米富豪
愈見閉糴自豐遂使江湖小熟之地反有饑餓不給之
民臣自江西以入湖南所到去處皆病於此及入湖北
愈覺益甚去歲江陵雖止蒙朝廷拋降和糴十萬石緣
湖北地廣人稀耕耨成裂種而不時俗名漫撒縱使收成

亦甚微薄每到豐稔之年僅足贍其境內萬一發泄出
外必至價直翔湧常年米價每石若及兩貫已為極貴
今米直陡添數百貫猶未已方此耕布之時使百姓困
於貴糴無以自給甚可憐也况本府既有補糴又有和
糴數目既多深恐置場不能頗足不免均之諸邑諸邑
復不免敷之百姓上下相乘其勢有甚不得已者其初
定價正當秋成米賤之際只據一時市直每石作一貫
五百具申及到後來諸處官司商販競來爭糴米直陡
貴官司但以事干朝廷只執原價不敢增添馴至今日
輸猶未足乃是百姓受錢於米賤之初而輸米於增價
之後甚者家無見儲不免轉糴以償於官焦熬如此可

不速爲之計哉臣契勘本府合糴米十萬據諸處申到
已糴及七萬尚有三萬未糴而見在之米已承朝廷指
揮未令起發以此見得淮浙亦不待此米之來所有未
糴三萬若得少緩收糴却得蘇此一方之民緣今已是
五月若俟朝廷行下然後住糴恐不及事臣已令本府
將糴未足米數且權住糴以待回降度使青黃不接之
交留得此米接濟百姓以了農事不勝幸甚

寧宗嘉定九年罷諸路旱蝗州縣和糴及四川關外科糴
十五年倪祖常守徽州州民困于和糴爲申省罷之
陳耆卿奏曰臣聞豐歉在天而制其豐歉者在人制
歉之法莫如和糴和糴將以利民也而民或以爲害其

故何哉夫有粟者之欲錢猶有錢者之欲粟也彼旣欲
之則惟恐和糴之不行爾而乃以爲害者非其情於事
情蓋由民與民爲市此其所樂也民與官爲市此其所
畏也畏官而復虐於官故寧閉戶以失利毋寧傾因以
賈害市之價增官之價減一害也市無斛面而官有斛
面二害也市以一人操槩量無他費焉而官之監臨者
多誅求者無厭三害也市先得錢而官先槩粟有候伺
之苦有錢陌不足之弊四害也四害不去故凶年未有
其利而豐年已罹其擾名雖爲和實則強之也比歲郡
國間苦水潦而亦多以稔告民得粟即飽未暇爲饑饉
謀也朝廷降度牒以收糴此意甚溥第恐所在州縣未

能痛戢吏姦萬一如前四害之陳則其關係邦本不輕而况邊備方殷積粟實塞之策尤今所急誠宜播告有司每遇收糴則必增其價而先予之錢蠲其斛面而俾自操其槩量吏有騷動取贏者必寘之于罰如是則雖一日萬斛彼將樂趨之不暇裕民實邊二責併塞失今不圖後將愈難惟陛下裁擇

理宗寶慶三年詔兩浙江東西湖南北州縣凡有米處申嚴遏糴之禁從汪剛中請也十一月汪剛中奏乞下戶部總所江湖荆襄兩淮漕司行下和糴州縣毋得科抑仍令產米之處增價招誘違者重寘于罰從之紹定元年資政殿學士知潭州曾從龍奏州縣賑民之法

有三曰濟曰貸曰糴濟不可常惟貸與糴為利可久今撥緡錢一千萬有奇分下潭州十縣委令佐糴米置惠民倉乞比附常平法從之十月趙至道奏乞行下諸路漕司嚴飭和糴官吏毋得多取增量庶民不憚與官為市從之二年進知臨安府官一等以和糴有勞也四年七月臣寮奏建劔之間秋霜害稼乞下諸司措置般運廣米應濟市糴從之臣寮奏乞嚴飭州縣科糴及人戶投糴不即給錢多取斛面之弊其州縣折苗並依祖宗成法止以下戶畸零減直折錢違者劾寘典憲從之五年八月臣寮奏乞行下兩淮荆襄諸郡將見椿管米各具實數或令侵移責令補足沿邊和糴高

價招誘不可均敷民戶嚴立賞格仍與定限庶幾及時
辦集內外皆有預備詔令戶部詳度上于尚書省 六
年正月監察御史何處又奏乞申飭諸道轉運司嚴飭
所部州縣不許過糴如歉郡招誘客販委官告糴仍具
數上之朝廷其阻糴苛稅者令御史臺劾奏從之 紹
定中曾用虎知興化軍事立平糴倉捐楮幣萬六千緡
為糴本益以廢寺之穀歲歉價高則發倉以糴之歲豐
價平則散諸寺易新穀為藏焉 二月即官王定奏義
倉為官吏蠹耗上曰此自是民戶寄留于官專為水旱
之備務令覺察 是年趙立夫進對畢上曰日今和糴
不可緩立夫奏臣昨尹京邑蒙朝廷委以糴事痛革吏

奸遂得不擾而辦上曰奸弊多端嚴與關防庶幾百姓
樂與官為市 嘉熙二年十二月詔諸道和糴去處給
時直平概量毋得科抑仍申嚴秋苗苛取之禁 三年
九月以江湖浙東建劔汀邵旱傷詔諸路提舉常平司
覈所部州縣常平義倉之儲以備賑濟仍飭制總司今
後毋輒移用違者坐之從左司諫徐榮叟請也 淳祐
元年詔提舉司毋得以常平侵移其義倉另項椿收仍
措上于尚書省 三年八月詔申嚴郡國社倉科配之
禁 汪剛中至蘭溪歲旱郡倚辦勸分剛中謂勸分所
以助義倉一切行之非所謂安富惜貧也願假常平錢
為糴本使得循環迭濟 七年出豐儲倉米三十萬石

以平糴價 九年九月提領戶部財用趙與憲創制新
倉三百餘間貯米一百二十萬石欲以淳祐爲名及照
豐儲倉例辟官四員從之 十年七月上諭輔臣曰和
糴本非朝廷之得已若官司奉行無擾則人戶自樂與
官爲市訪聞近年所在和糴未得朝廷拋降預行多敷
富室大家臨期卒以賂免而中產下戶反被均敷之害
以至散錢則吏胥減尅納米則斛面取贏專計誅求費
用尤黷民間所得糴本每石幾耗其半其何以堪可申
嚴約束 是時葉夢鼎知袁州轉運使和糴三萬斛夢
鼎言袁山多田少朝廷免和糴已百年自今開之百姓
有無窮之患從之 寶祐中牟子才知太平州郡有平

糴倉以米五千石益之以緡錢二十六萬創抵庫歲收
其息助糴本 景定元年上問近日京城米價賈似道
奏見行賑濟以平市價此去秋成糴價必減 二年上
曰邇年和糴止及民戶今歲水潦若此凡御前庄米亦
照民間所科之數輸之有司以示上下一體之意

度宗咸淳元年有旨豐儲倉撥公田米五十萬石付平糴
倉遇米貴平價出糴 監察御史趙頰孫上言今日急
務莫過於平糴乾道間米斗直五六百錢者孝宗聞之
即罷其守更用賢守此今日所當法者今粒食翔踴未
知所留市井之間見楮而不見米推原其由實富家大
姓所至閉廩所以糴價愈高而楮價陰減陛下念小民

艱食爲之發常平義倉然爲數有限安得人人而濟願
陛下課官吏使之任牛羊芻牧之責勸富民使之無秦
越肥瘠之視糴一年則楮價不因之而輕物價不因之
而重矣 九年臣寮言州縣交量科糴之弊乞行下江
西湖南運司各仰遵守已降指揮遴選諸郡清強正佐
幟職等官互徃隣郡交納和糴不許差右選及權豪等
貪謬之人充應仍各遍牒本路州軍守倅毋使奸吏生
事淹滯所委之官如有違戾從御史臺覺察聞奏

遼

聖宗統和十三年冬十月令郡縣置義倉歲秋熟社民隨
所獲戶出粟儲倉社司籍其目歲歉發以賑民 十五

年詔免南京舊倉粟 時東京咸信蘇復辰海同銀烏
遂春泰等五十餘城內沿邊諸州各有和糴倉依祖宗
法出舊易新許民自願假貸收息二分所在無慮二三
十萬石雖累兵興未嘗乏用

道宗太康時耶律孟簡以中京饑減價糶粟以賑民

金

熙宗皇統二年十月燕西東京河東河北山東汴京等秋
熟命有司增價和糶

世宗大定二年以正隆之後倉廩久匱遣太子少師完顏
守道等山東東西路收糶軍糧除戶口歲食外盡令納
官給其直 三年謂宰臣曰國家經費甚大向令山東

和糴止得四十五萬餘石未足爲備自古水旱所以無患者由蓄積多也山東軍屯處須急爲二年之儲若遇水旱則用賑濟自餘宿兵之郡亦須糴以足之京師之用甚大所須之物其勅戶部宜急爲計 五年青寧臣曰朕謂積貯爲國本當修倉廩以廣和糴今聞外路官文具而已卿等不留心甚不稱委任之意 六年八月勅有司秋成之後可於諸路和糴以備水旱 九年正月諭宰臣曰朕觀宋人虛誕恐不能久遵誓約其令將臣謹飭邊備以戒不虞去歲河南豐宜令所在廣糴以實倉廩 詔州縣和糴毋得抑配百姓 十年十月上責戶部官曰隨處時有賑濟徃徃近地無糧取于他處

往返既遠人愈難之何爲不隨處起倉年豐則多糴以備賑濟設有緩急亦豈不易辦乎而徒使錢充府庫將安用之 十二年十二月詔在都和糴以實倉廩且使錢幣通流又詔九秋熟之郡廣糴以備水旱 十四年詔定常平倉制中外行之其法尋廢 十六年五月諭右丞相紇石烈良弼曰西邊自來不備儲畜其令所在和糴以備緩急 十七年三月尚書省奏賑東京三路粟不能周給命自今預備當以爲常 四月尚書省奏東京三路十二猛安尤缺粟者已賑之矣有未賑者詔遣官詣復州爲蘇館路檢視富家畜積有餘者增直以糴令近地居民就徃受糧 十八年四月命泰州所管

續文獻通考卷之三十一 四百五十五
諸猛安西北路招討司所管奚猛安咸平府慶雲縣霧
鬆河等處遇豐年多和糴

章宗明昌元年八月御史請復設常平倉勅省臣詳議以
聞省臣言大定舊制豐年則增市價十之二以糴儉歲
則減市價十之一以出夫所以豐則增價以收者恐物
賤傷農儉則減價以出者恐物貴傷民增之減之以平
粟價故謂常平非謂使天下之民專仰給于此也今天
下生齒至衆如欲計口使餘一年之儲則不惟數多難
辦又慮出不以時而致腐敗也况復有司抑配之弊殊
非經久之計如計諸郡縣驗戶口例以月支三斗爲率
每口但儲三月已及千萬數亦足以平物價救荒凶矣

若令諸處自官兵三年食外可充三月之食者免糴其
不及者俟豐年糴之庶可久行也然立法之始貴在必
行其令提刑司各路計司兼領之郡縣吏沮格者糾能
推行者加權用若中都路年穀不熟之所則依常平法
減其價三之一以糴詔從之 三年八月勅常平倉往
徃有名無實况遠縣人戶豈肯跋涉直就州府糴糴可
各縣置倉命州府縣官兼提控管勾遂定制縣距州六
十里內就州倉六十里外則特置舊擬備戶口三月之
糧恐數多致損改令戶二萬以上備三萬石一萬以上
備二萬石一萬以下五千以上備萬五千石五千戶以
下備五千石河南陝西屯軍儲糧之縣不在是數州縣

有倉仍舊否則剗置郡縣吏受代所糴粟無壞一月內
同勾管交割給由如無勾管亦准上交割違限委州府
并提刑司差官催督監交本處歲豐而收糴不及一分
者本等內降提刑司體察直申尚書省至日斟酌黜陟
九月勅置常平倉之地令州府官提舉之縣官兼督
其事以所糴多寡約量升降爲永制又諭尚書省曰上
京路州縣未有常平倉如亦可置定其備粟數以聞
十二月勅華州下邽縣置武定殖倉京兆櫟陽縣置粟
邑鎮倉許州舞陽縣置北舞渡倉各設倉草都監一人
兼領之 四年七月諭旨戶部官聞通州米粟甚賤若
以平價官糴之何如于是有司奏中都路去歲不熟今

其價稍減者以商旅運販繼至故也若即差官爭糴切
恐市價騰涌貧民愈病請俟秋收日依常平倉條例收
糴詔從之 十月尚書省奏今上京蒲與速頻曷懶胡
里改等路猛安謀克民戶計一十七萬六千有餘每歲
收稅粟二十萬五千餘石臣等以爲此地收多支少遇
災足以賑濟常平倉似不必置遂止 五年五月上曰
聞米價騰湧今官運至者有餘可減直以糴之其明告
民不須貴價私糴 九月尚書省奏明昌三年始設常
平倉定其永制天下常平倉總五百一十九處見積粟
三千七百八十六萬三千餘石可備官兵五年之食米
八百一十餘萬石可備四年之用而見在錢總三千三

百四十三萬貫有奇僅支二年以上見錢既少且比年稍豐而米價猶貴若復預糴恐米價騰湧於民未便遂詔權罷中外常平倉和糴俟官錢羨餘日舉行六年七月勅宰臣曰畿內饑饉之地令減價糴之而貧民無錢者何以得食其議賑濟省臣以爲缺食州縣一年則當賑貸二年然後賑濟如其民實無恒產者雖應賑貸亦請賑濟上遂命間隔饑荒之地可以辦錢收糴者減價糴之貧乏無依者賑濟時北京民方乏食完顏襄請減價出糴倉粟以濟之或以兵食方缺爲言襄曰烏有民足而兵不足者卒行之民大悅承安元年六月上以百姓艱食詔出倉粟十萬石減價以糴時馬璧調遼瀕主簿有和糴粟未給價者餘十萬斛散貯民居以富人掌之有腐敗則責償于民民苦之壁白漕司罷之民大悅

宣宗貞祐三年十月命高汝礪糴于河南諸郡令民輸輓入京復命在京諸倉糴民輸之餘粟侍御史黃摑奴言汝礪所糴足給歲支民既于租賦之外轉輓而來亦已勞矣止將其餘以爲歸貲而又強取之可乎且糴此有日矣而止得二百餘石此何濟也詔罷之十二月上聞近京郡縣多糴于京師穀價翔躄今尚書省集戶部講議所開封府轉運司議所以制之者戶部及講議所言以五斗出城者可闡糴其半轉運司謂宜悉禁其出上

從開封府議謂寶券初行時民甚重之但以河北陝西諸路所支既多人遂輕之商賈爭收入京以市金銀銀價昂穀亦隨之若今寶券路各殊制則不可復入河南河南金銀賤而穀自輕若直閉京城粟不出則外亦自守不復入京穀當益貴宜諭郡縣小民無妄增價官爲定制務從其便 四年河北行省侯摯言河北人相食觀滄等州斗米銀十餘兩伏見沿河諸津許販粟北渡然每石官糴其八商人無利誰肯爲之且河朔之民皆陛下赤子旣罹兵革又坐視其死臣恐弄兵之徒得以藉口而起也願止其糴從民輸販爲便詔從之又制凡軍民客旅粟不干官糴處糴而私販渡河者杖一百沿

河軍及譏察權豪家犯者並以物沒官 上以河北州府錢多其散失民間頗廣命尚書省措畫之省臣奏河北艱食販粟北渡者衆宜權立法以遮糴之擬于諸渡口南岸選通練財貨官先以金銀絲絹等博易商販之糧轉易之北岸以回易糴本兼收見錢不惟杜奸弊亦使錢入京師從之 又上封事者言比年以來屢屢艱食雖由調度征歛之煩亦兼并之家有以奪之也熟收則乘賤多糴困急則以貸人私立質券名爲無利而實數倍饑民惟恐不得莫敢較者故農工甫畢官債未了而國已空矣此富者益富而貧者益貧也國朝立法舉財物者月利不過三分積久至倍則止今或不朞月而

息三倍願明勅有司舉行舊法豐熟之日增價和糴則
在公有益而私無損矣詔宰臣行之 是年權河東南
路宣撫副使烏古論慶壽言邀糴事見監門興定元年
上頗聞百姓以和糴太重棄業者多命宰臣加意 六
月以戶部郎中楊貞權陝西行六部尚書收給潼陝軍
馬之用奏糴販糧濟河者之半以寬民從之 八月立
和糴賞格

哀宗天興二年八月蔡州加設四隅和糴官
元

初立義倉于鄉社又置常平于路府使饑不損民豐不傷
農粟直不低昂而民無菜色其常平倉至元六年始立

其法豐年米賤官為增價糴之歉年米貴官為減價糴
之八年以和糴糧及諸路倉所撥糧貯焉 二十三年
定鐵法又以鐵課糴糧充貯義倉 皇慶二年復申其
令然行之既久名存而實廢矣

世祖中統二年置和糴所于開平以戶部郎中宋紹祖為
提舉和糴官 始以鈔一千二百錠於上都北京西京
等處糴參萬石

按和糴之名有二曰市糴糧曰塩折草率皆增其直而
市於民於是兵不乏食馬不乏芻而民亦不困其為法
盖亦善矣第行之既久官吏之需求百出價值之高下
懸殊名雖和而實則強也市糴糧之法見於各年下不

錄塩折草之法成宗大德八年定其則例每年以河間
塩令有司於五月預給京師郡縣之民至秋成各驗塩
數輸草以給京師秣馬之用每塩二斤折草一束重一
十斤歲用草八百萬束折塩四萬引云

四年三月遣使和糴京東 又以解塩引一萬五千道

和中陝西軍儲 五年諭北京西京等路市糴軍糧

至元元年勅北京西京宣慰司隆興總管府和糴以備

糧餉 三年南京等處和糴四十萬石 四年命沔州

等處中納官糧續還其直 七年尚書省臣言河西和

糴應僧人豪官富民一例行之制可 八年驗各路糧

粟價直增十分之一和糴三十九萬四千六百六十石

十五年置甘州和糴提舉司以備給軍餉賑貧民

十六年以兩淮塩引五萬道募客旅中糧 十九年九

月發鈔三萬錠于隆興德興府宣德州和糴糧九萬石

二十年以鈔五千錠市於北京六萬錠市上都二千

錠市應昌 二十一年以河間山東兩浙兩淮塩引募

諸人中糧 四月以鈔四千錠於應昌市糴 九月發

塩引七萬道鈔三萬錠於上都和糴 立常平倉以五

十萬石價鈔給之 二十二年冬十月以鈔五千錠和

糴于應昌府 又詔江南民田秋成官爲定例收糴次

年減價出糴 二十三年發鈔五千錠市糴沙靜隆興

軍糧 二十四年官發塩引聽民中糧 十二月以揚

州杭州鹽引五十萬道兌換民糧 二十五年桑哥言
自至元丙子置應昌和糴所其間必多盜詐宜加鈎考
從之 二十七年和糴西京糧其價每一十兩之上增
一兩

武宗至大二年尚書省臣言臣等竊計國之糧儲歲費寢
廣而所入不足今歲江南頗熟欲遣使和糴恐米價暴
增請以至大鈔二千錠分之江浙河南江西湖廣四省
於來歲諸色應支糧者視時直予以鈔可得百萬不給
則聽以各省錢足之制可 九月立常平倉以權物價
豐年糴粟麥米穀俟價高之時減價以糴

仁宗延祐四年二月勅郡縣各社復置義倉初世祖時趙

天麟上策曰隋開皇五年長孫平奏令軍民當社共立
義倉收穫之日隨其所得各出粟麥貯之當社社司檢
校勿使損壞當社饑饉即用賑給至于隋末公私廩積
可供五十年長孫平之力也迨至元六年有旨每社立
一義倉社長主之每遇年熟每親丁納粟五十驅丁二
斗無粟聽納雜色官司並不得拘檢借貸勒支後遇歉
歲就給社民食用社長明置收支文曆無致損耗自是
以來二十餘年于今矣然而社倉多有空乏之處頃來
水旱相仍蝗螟蔽天饑饉薦臻四方迭苦轉互就食老
弱不能遠移而殍者衆矣彼隋立義倉而富今立義倉
而貧豈今民之不及隋民哉臣試陳之今條款使義倉

計丁納粟意以饑饉之時計丁出之以取均也又條款使驅丁半之彼驅丁亦人也尊卑雖異口腹無殊至儉之日驅丁豈可獨半食哉又計丁出納則婦人不納豈不食哉又同社村居無田者豈可坐視而獨不獲哉樂歲粒米狼戾乞丐者踵門猶且與之况一社之人而至儉豈宜分彼此哉是蓋當時大臣議法者有乖陛下之本心也伏望陛下普頒明詔詳諭農民凡一社立社長社司各一人社下諸家共穿築倉窖一所為義倉凡子粒成熟之時納則計田產頃畝之多寡而聚之凡納例常年每畝粟率一升稻率二升凡大有年聽自相勸督而增數納之凡水旱螟蝗聽自相免凡同社豐歉不均

宜免其歉者所當納之數凡饑饉不得已之時出則計口數之多寡而散之凡出例每口日一升儲多每口日二升勤為定體凡社長社司掌管義倉不得私用凡官司不得拘檢借貸及許納雜色皆有前詔在焉如是則非惟共相賑救而義風亦行矣是時中糴和林糧二十三萬石五年六年又各和中二十萬石

英宗至治元年五月御史劉恒請興義倉

泰定帝泰定二年九月以郡縣饑勅有司治義倉四年正月燕南廉訪司請立真定常平倉不報

文宗至順二年冬十月中書省臣言明年海漕米二百六十萬石恐不足若令運九十萬而命河南發三十萬江

西發十萬為宜又遣官賫鈔十萬錠鹽引三萬五千道於通遼陵滄四州優價和糴米三十萬石又以鈔二萬五千錠鹽引萬五千道於通遼二州和糴粟豆十五萬石鈔三十萬錠往遼陽懿錦二州和糴粟豆十萬石並從之

順帝至元元年立常平倉至正二年中書左丞太平以粟貴而金銀賤請出官本委官收市之所得不貲其後兵興卒獲其用十四年江淮兵起京師食不足命貢師泰和糴於浙西得百萬石十五年冬十月命和糴粟豆五十萬石于遼陽

皇明

英宗正統四年十月大學士楊士奇上言堯湯之世不免水旱而堯湯之民不聞困瘁者有備故也我太祖皇帝篤意養民備荒有制天下郡縣悉出官鈔糴穀貯倉以時散歛又相其地開濬陂塘脩築圩壩以備水旱小大之民各安其業歲久弊滋豪猾侵漁穀盡倉毀凡諸水利亦多湮廢或被占奪稍遇凶荒民無所賴風憲官不行舉正守令漫不究心事雖若緩所繫甚切請擇遣京官廉幹者往督有司凡豐稔州縣各出庫銀平糴儲以備荒陂塘圩壩皆令脩復具實奏聞郡縣官以此舉廢為殿最風憲官巡歷各務稽考仍有欺蔽怠廢者具奏罪之庶幾官有備荒之積民無旱潦之虞仁政所施

無切於此 上曰此祖宗良法美意 命戶部急行之

五年正月令六部都察院推選屬官領 勅分詣兩

畿各省府州縣立預備倉發所在庫銀糴糧貯之軍民

中有能出粟以佐官者授以散官旌其門

憲宗成化十八年正月 命南京糴常平倉糧時歲饑米

貴南京戶部議減價糴以濟民候秋成平糴還倉

世宗嘉靖十二年戶部尚書許瓚言郡縣贖銀引稅多乾

沒無稽宜令糴穀備賑從之

今上萬曆二十九年十二月戶部覆福建巡撫金學魯題

鄉官陳長祚林鳴盛倡義建常平倉于官勸義倉于民

又有義廩以倡縉紳之尚義者及知州車大任等官俱

行紀錄長祚等量加服色以鼓尚義 上是之

續文獻通考卷之三十一終

續文獻通考

卷之三十一

續文獻通考卷之三十一

皇明進士雲間王圻纂輯

土貢考 貢法 宋遼金元

宋

高宗紹興三十一年兩浙轉運司獻釐積錢二萬緡臨安府獻五萬緡上謂大臣曰可椿留外府若下諸路切戒毋得科敷如昔時羨餘適資贓吏而擾吾民也 上謂輔臣曰近大將入覲有以寶貨鞍馬為獻者惟馬不可缺餘皆却之蓋慮以進奉為名公私掊剋有害軍政耳是秋申嚴獻羨餘之禁從劉珙奏也 葉顥知常州或勸獻羨餘顥曰羨餘非重征則橫斂是民之膏血也弗

聽

孝宗隆興元年詔自今後內外主兵官進奉會慶聖節香
疏有合併沉香並不得過二十兩馬不得過四匹餘物
並不得投進 十二月詔諸路州軍歲起上供錢物例
有拖欠監司郡守却以羨餘進獻僥冒賞典今後上供
錢物須官依限起發數足如輒行率歛進獻仰本部按
劾以聞 是歲廣東提刑司獻緡錢十五萬有旨令就
便撥賜廣西所司充本路今年上供錢 乾道三年劉
珙入見論羨餘之弊曰州縣賦入有常大郡僅足支遣
小郡往往匱乏而近者四方尚有以贏餘獻者不過重
折苗米或倍稅商人之有此民之未便者也望詔止之

上嘉納焉 八年知光州滕瑞奏遇天中聖節臣自書
聖壽萬歲四字約二丈餘無造山棚高三丈餘凡用絹
五十疋襍背投進上曰滕瑞不脩郡政以此獻諛特降
一官 九年侍御史蘇嶠奏伏覩廣南提舉官廖顯劄
子廣州都鹽倉有積下支不盡塩本銀計錢十一萬一
千四百五十四貫文又點檢得本路諸州府逐年拘收
常平諸色錢物內有見在寬剩錢五萬貫欲行起發少
助朝廷經費奉旨並令赴南庫送納者臣竊謂陛下即
位以來屢却羨餘之獻故近年監司州縣稍知遵守此
盛德之事而小人之急于自進時以一二嘗試朝廷只
緣乾道七年提舉官章潭獻錢二十萬貫以此特轉一

續文獻通考卷之三十三
官不及期年轉爲廣西運判廖顥實繼其後故到官未
幾便爲此舉其爲愚弄朝廷莫此爲甚訪聞此錢並係
塩本錢潭到任時尚有三四十萬緡皆是前官累次儲
積不敢妄用潭取其半以獻今顥所獻止一萬緡已
是竭澤所餘無幾後人何以爲繼異時課額不登誰將
任其咎欲望特降旨卻而不受即以此錢付之本司依
舊充塩本內常平寬剩錢亦乞椿留本路爲水旱賑貸
之備詔從之 淳熙六年趙雄等奏昨日蒙恩賜新荔
枝流香酒上曰朕却獻方物所以四方珍味佳果俱不
曾有昨日新荔枝蒙太上皇帝賜到所以分賜卿等朕
聞舊日京師謂之獻時新故遠方新珍之物奔走爭先

勞人動衆害物甚多朕欲痛革此事最不喜時新之物
盖世俗旣競時新則不待物性成就而爭先採摘甚可
惜也 十年廣西經畧安撫司奏安南國牒已排辦章
表投進方物上曰象乃無用之物經由道路重擾吾民
除不受外將入貢之物以十分爲率止受一分就界上
交割

寧宗嘉泰元年詔瑞慶節諸道毋入貢

理宗紹定五年詔大行皇太后陵寢諸路監司州府軍監
寺正進慰表其餘禮物並令免進仍不得以助修奉攢
宮爲名有所貢獻 六年上卻歸正畚臣康守正王全
所獻馬已而出御札賜輔臣曰近康守正王全以馬來

獻朕方禁飭臣下勿受餽遺豈有自開此門兼恐遠人以此窺朕好尚昔漢文卻千里馬朕素慕之卿等以爲如何輔臣乞宣付史館從之 寶祐二年董槐奏邇者陛下飭內外諸司有方物來獻者勿納仰讀聖訓可以弭災召和 景定元年詔倪垕獻羨希賞再削一官仍下監司郡守今後移易窠名輒行獻羨者照祖宗典故行之著爲令

度宗咸淳二年謝方叔罷相歸豫章一日以琴一張丹藥一爐獻上蓋以舊學故也賈似道疑其有觀望再相之意令臺劾之以爲不當誘人主爲聲色之好欲謫遠郡賴呂文德以已官職贖丞相之罪遂得免論者曰專權忌能賈固不能無罪閒居貢獻謝亦有以取之也

荆湖貢茶法

荆南府租額錢三十一萬五千一百四十八貫三百七十五文納潭岳歸峽州荆南府片散茶共八十七萬五千三百五十七斤漢陽軍租額錢二十一萬八千三百一十一貫五十一文納鄂州片茶二十三萬八千三百斤半蘄州蘄口額錢三十五萬九千八百三十九貫八百一十四文納潭州興國軍片茶五十萬斤黃州麻城場買茶二十八萬四千二百七十斤賣錢一萬二千五百四十貫蘄州洗馬場買茶四十萬斤賣錢二萬六千三百六十貫王祺場買茶一十八萬二千二百二

十七斤賣錢一千九百五十三貫九百九十二文石橋
場買茶五十五萬斤賣錢三萬二千八十貫

福建路每年常貢

福州 荔枝乾 荔枝煎 生荔枝紹興初貢二十四年罷

紅蕉花布大中祥符天聖元祐間俱貢紹興初以福清觀音泥院請罷

乾薑 沙魚建炎三年罷 鹿角菜 紫菜俱宣和七年罷

蕉乾建炎初罷 上供銀六萬八千七百四十一兩四錢

大禮銀每遇郊祀年別進奉九千兩 上供錢六千貫 無額上供

錢一萬五千五百一十八貫七百五十文 甲葉六萬

八千九百一十五片黃牛皮九百四段六十尺羊皮一

千八百一十二張一十丈 認發建寧府黃牛皮四十

八段羊皮八十九張泛拋每歲兩科甲葉三萬五千片

黃牛皮八百段 羊皮七百張

建寧府 上供細色茶五綱 粗色茶七綱 練布

年額上供銀九千七百五十四兩 大禮助賞銀三千

七百五十六兩 聖節銀 大禮進奉銀各一千七百

兩 提點司進奉銀三十七兩五錢記上俱建安既寧嘉禾松溪政和五

縣所貢

泉州 蕉布永春縣出 生苧布各二十疋 綿一百兩南安

縣出俱淳祐中貢 山薑花三十朵 橄欖子上色一萬顆次三

萬顆治平六年罷 綿一百兩 蕉布葛布共五十疋元豐中貢

松子五百斤宣和六年詔減後罷 上供銀九千六百四十二兩

三錢 上供錢一萬五千七百六十五貫七十五文

大禮賞給錢一萬八千九百九貫三百九十五文 春

冬衣賜錢二萬六千二百貫五百二十五文 犒軍錢三

千七百二十三貫四百文

漳州 鮫魚皮 柑 橘

汀州 蠟燭二百條 上供銀七千九百四十五兩八

錢三分五厘 聖節進奉銀 大禮銀各二千兩 上

供錢九千七百七十貫九百一文

南劍州 土茴香 茶 銀六千三百七十兩 此順昌一縣所

貢

邵武軍 上供銀一千四百四十一兩四錢 軋會聖

節銀二百五十兩 大禮銀四百兩

興化軍 綿一百兩 葛布一十疋 上供錢七千五

百四十貫文 節旦上供銀共一千八百三十三兩三

錢三分四厘

閩以外無可考

遼

太祖三年三月幽鎮魏定等州來貢 惕隱涅古滾進白

糧 非常貢

太宗會同元年二月室韋進白鹿 非常貢 六年六月奚

鈿勃德部進白麝 非常貢

穆宗應曆二年十月司徒老古等獻白雉 非常貢 七年

十月近侍烏古者進石錯

聖宗統和元年十月南京留守于越休哥請每歲諸節度使貢獻如契丹常例止進鞍馬許之 十二月以顯州歲貢綾錦分賜左右 五年五月烏隈于厥部以歲貢貂鼠皮非土產皆于他處轉貿以獻乞改貢詔自今止進牛馬 十二年二月免諸部歲貢羊 十四年閏七月五院部進穴地所得金馬非常貢 十五年三月元惹烏昭度以地遠乞歲時免進鷹馬貂皮詔以生辰正旦貢如舊餘免 四月罷奚王諸部歲貢麇 十月罷奚正諸部貢物 二十一年十二月罷三京諸道貢 二十二年三月罷蕃部賀千齡節及冬至重五貢 開

泰七年三月命東北越里篤部阿里粵里米蒲奴里鉄驪等五部歲貢貂皮六萬五千馬三百 八年七月詔阻卜依舊歲貢馬千七百駝四百四十貂鼠皮一萬青鼠皮二萬五千 九年九月西南招討奏党項部有宋犀族輸貢不時常有他意宜以時遣使督之詔曰邊鄙小族歲有常貢邊臣驕縱征歛無度彼懷懼不能自達耳遣清慎官將示以恩信無或浸漁自然效順

興宗重熙二十一年九月平州進黑兔非常貢 太康三年正月省諸道春貢金帛及停周歲所輸尚方銀 太安三年四月免諸路貢輸之半 十月罷節度使以下進珍玩 四年四月減諸路常貢御服 七年六月倒

塌嶺人進古鼎有文曰萬歲永為寶非常貢 壽隆三年六月詔罷諸路馳驛貢新

與國之貢

吳越王錢鏐于遼太祖九年十月遣滕彥休來貢又于太宗五年正月遣使貢犀角珊瑚 又于天顯七年二月遣使獻寶器

南唐于太宗天顯三年四月進白龜 十二年八月遣使來貢 又于穆宗應曆二年正月進犀兕甲萬領

唐于太宗天顯三年十月遣使進玉笛及紅牙笙 晉石敬瑭于太宗天顯十二年六月以遼得援為帝歸馬門以北及幽薊之地仍歲貢帛三十萬匹 會同元年

十月進獨峯駝及名馬 二年正月晉進珍幣 七月進犀帶 八月遣使貢歲幣 三年四月遣使進茶藥及弓矢又貢名馬及布 四年進香藥又以許祀南郊進黃金鎰又遣使進櫻桃水晶硯犀弓竹矢 五年進射柳鞍馬

漢遣使于穆宗應曆元年十二月獻弓矢良馬 二年進蒲萄酒 三年進裘馬及衣 又遣使貢藥 四年遣使進茶藥 七年遣使來貢 十六年遣使貢金器鎧甲 景宗保寧時常遣使來貢及進蒲萄酒 周主郭威于世宗天祿五年遣使致良馬

宋于聖宗統和二十二年遣李繼昌請和願歲輸銀十萬

宋兩絹二十萬疋 興宗重熙十一年九月耶律仁先遣

人報宋歲增銀絹十萬兩疋文書稱貢按宋史富弼力却獻納二字後

竟與納字則稱貢之說誣也 二十四年正月遣使來餽馴象 道

宗壽隆四年正月宋遣使來餽錦綺 天祚帝天慶五

年七月阿骨打反亂遣使致助軍銀絹

金 大同府貢瑪瑙數珠 涿州貢羅大定年罷之 平

州貢櫻桃綾地理志可考者止此

海陵天福三年三月罷歲貢鷹隼 命太常官饒惟進魚

肉舊貢鵝鴨等悉罷之 又貢猪二萬俱大定時罷之

會寧府貢燕王魚

世宗大定三年十一月罷貢金線段疋 四年正月罷路

府州元日及萬歲節貢獻 八年十月詔罷復州歲貢

鹿茸 十一年六月詔諸路常貢數內同州沙苑羊非

急用徒勞民罷之 十三年七月罷歲貢雉尾 二十

年十月詔西北路招討司每進馬馳鷹鴨等輒率歛部

內自今並罷之 二十二年十二月罷鋪遞送荔枝

二十七年五月詔罷曷懶路所進海葱及太府監日進

時果惟上林果三日一進 時黃久約使宋返道經宿

泗見貢新枇杷子者州縣調民夫遍進奏罷之

章宗明昌四年正月却東京路副使王勝進鷹 泰和元

年十一月諭工部無以進柑橙擾懷州民遇有則進無

四十七

四十七

四十七

四十七

四十七

四十七

四十七

則已

宣宗貞祐三年九月陳州鎮防軍段仲連進羊三百詔遷
三官

哀宗正大元年正月邠州節度使移刺木納阿卜進白兔
詔曰得賢輔佐年穀豐登此上瑞也焉用此為令有司
資道里費縱之本土 六年六月隴州節度使石抹冬
兒進黃鸚鵡詔曰外方獻珍禽異獸違物性損人力令
弗復獻 天興元年四月許州進櫻桃

太宗天會時宋貢銀二十萬兩絹三十萬疋時與宋徽宗

熙宗皇統時宋貢銀二十萬兩絹二十五萬疋自壬戌年
始每春季差人至泗州交納時與宋高宗

世宗大定時宋增貢銀三十萬兩絹三十萬疋大軍還時
宋許犒軍錢三十萬貫邀其銀三百萬兩宋人移書乞
減乃如其前時與宋寧宗

元

憲宗七年回鶻獻水精盆珍珠傘等物可直銀三萬餘錠
帝曰方今百姓疲弊所急者錢耳朕獨有此何為却之
賽典赤以為言帝稍償其值且禁其勿復有所獻

世祖中統二年六月勅平陽路安邑縣蒲萄酒自今弗貢
至元元年正月楊大淵進花羅紅邊絹各百五十段
優詔諭之 八月禁勿用官物進獻 二八東乞兒部
牙西來朝貢銀鼠皮二千賜金素幣各九帛十有八

續文獻通考卷之三十三
十三年九月勅常德府歲貢包茅 十五年阿里海牙
入朝獻金三千五百八十兩銀五萬三千一百兩
胡粹中評曰世祖天資仁厚宇量寬宏獨好利之心差
勝耳漢祖入關惟收圖書版籍婦女貨財一無所取其
豁達大度越常人遠矣世祖得江南之後即陳宋寶王
於殿庭又檢覈新舊錢穀置徵理司立規措所權茶酤
賣及阿里海牙入朝受所獻金銀又受忙忽帶獻真珠
一百斤故令權奸若阿合馬桑哥盧世榮皆以言利進
蓋上有好者下必有甚焉者矣於是阿合馬欲殺崔斌
則誣以盜糧四十萬桑哥欲害郭孝楊居寬則奏其虧
欠鈔六十餘錠忙忽帶謀陷劉宣則言其阻壞錢糧終

至元之世江南三省盜起不止皆由於鈎考理筭刻剥
生民蓋好利之弊一至於此也當時阿刺瓦下坐盜鈔
二萬馬三匹楊璉真加發宋陵取金銀八千五百兩受
獻鈔十餘萬寶至無等盧世榮盜官物金銀二萬餘錠
他物稱是苟上之人不欲彼曷由至此哉 十六年占
城馬八兒諸國遣使以珍物及犀象各一來貢 交趾
貢馴象 十八年免今歲耽羅國入貢白紵 十九年
闍婆國貢金佛塔 高麗國王貢紬布四百疋 二十
年七月新附官周文英入見其贄禮銀萬兩金四十錠
鐵木兒不花匿爲已有詔即其家搜閱沒入官帑 高
麗國王貢氊布綿紬等物四百段 二十二年江頭城

進童男童女八十人并銀器幣帛 二十二年勅自今
貢物惟地所產非所產者毋輒上 二十四年六月百
官以職守不得從征彛顏頤獻馬以給衛士 七月弘
州匠官以犬兔毛製如西錦者以獻 馬八兒國貢奇
獸類騾而巨毛白黑間錯 三十年回回獻大珠要價
數萬上曰珠何用當留是錢以賑貧遂却之 江淮行
院進鷹却之勅自今軍官毋縱禽擾民違者論罪 勅
福建毋進鶻 三十一年成宗未改元 雲南金齒路進馴象
三趙天麟上策曰方今纂組綾錦金珠璧貝未嘗無之
殊方異物禽鳥犀象未嘗卻之至於珍羞異饌自山海
而來者多矣俳優賤物充一笑之資者衆矣其間爲害

不一試畧陳之夫貧人富戶相去懸殊富者見在上之
奢麗雖日承示儉之詔而不從焉蓋從行不從言也以
致風俗大變貧者益貧能無爲濫之民乎極寒之後風
雪飛揚漁樵之流乞丐之人龜手粟肌鶻衣襤褸內皆
饑餒外罹寒凍原其所失由富民之奢故也貧民之心
非獨不欲奢也但其勢不得然耳幸獲微利則又狗習
俗而用之此所以貧者益貧也夫牛馬雞犬之類中國
之所常有上下之所共畜畜之無失其時則所謂得實
利而壯吾國之基彼斑斕之獸粲錯之馬有之不足以
增光無之不足以爲歉者近年以來駢羅而至梯山航
海輦贖輿金或重譯而來呈或望風而並湊府無虛月

史不絕書若以冠帶百蠻車書萬里而論之則不世之
嘉致莫大之神功若以帝王大體古今通議而言之則
受之而不卻啓之而不杜亦非所以盡聖明之本心也
按夏禹任土作貢而召公之戒其主且曰不作無益害
有益功乃成不貴異物賤用物民乃足珍禽異獸不育
於國不寶遠物則遠人格真知言者也東周之際楚子
不臣包茅不至無以縮酒齊桓仗義而問其罪春秋大
之西漢之時大宛未服天馬未來怒激中國武帝恃力
而侵其域當代病之此二者足以審中國之貢乃所當
然而遠人之物未宜取之也豈惟遠人之物未宜取之
哉至於中國無益之物亦不可取之也是以孝文還牛

里馬元帝罷齊三服官仁儉之名如揭日月雖欲下民
之不感豈可得哉且異物蕩心其害一也使外國聞之
而以國家爲有嗜好其害二也水陸轉運役人非細其
害三也有三害而無一利亦何尚之哉伏望陛下昭播
徽聲俾揚遐境凡四遠之納款者聽書檄奏聞而不求
其獻物聽子弟入朝而不求其納賄若然則化天下以
德示天下以無欲將見西番東徼之主君羣慕靈州之
酋長承恩而來享慕道以來王矣

成宗元貞元年詔遼陽省進海東青鶻 緬國獻舍利寶
玩 二年罷四川馬湖進獨本葱 罷進葡萄酒以園
業還之民 大德七年帝詔中書省臣曰比有以歲課

增羨希求爵賞者此非培尅於民從何而出自今除元
額外勿以增羨作正數 禁諸人非奉旨毋得以寶貨
進 雲南行省平章也速帶兒入朝以所獲軍中金五
百兩爲獻帝曰是金卿效死所獲者賜鈔千錠 今忽
賽因以獻鷹犬復除大寧路達魯花赤 八年詔朝廷
諸王駙馬進捕鷹鷂皆有定戶自今非鷹師而乘傳曷
進者罪之 九年商胡塔乞以寶貨來獻以鈔六萬錠
給其直 時賈胡有獻寶珠求售者議以六十萬錠酌
之曰此所謂狎忽大珠也含之則不渴熨面而可使目
有光左丞尚文曰一人含千萬人不渴則誠寶也若一
寶止濟一人則用已微矣吾之所謂寶者米粟是也有

之則百姓安無則天下亂以功用較之豈不愈於彼乎

十年夏四月詔求鷹犬凡匿者沒家貲半答三十來

獻者給賞 十一年時武宗未改元比怯來木丁獻寶貨勅以

鹽萬引與之仍許市引九萬詳見鹽考

武宗至大元年中書省臣言行泉院專以守寶貨爲任宜

禁私獻寶貨者 泉州大商進珍異寶帶 罷江南進

沙糖 大尉脫脫奏泉州大商進異木沉檀香構宮室

者勅江浙行省驛致之 至大四年時仁宗未改元近侍有言

賈人獻美珠者帝曰吾服御雅不喜飾以珠璣生民膏

血不可輕耗汝等當廣進賢才以恭儉愛人相規不可

以奢靡蠹財相導言者慚而退 又淮東宣慰使撒都

獻王觀音七寶帽頂寶帶寶鞍卻之戒諭如初 皇慶

元年諸王也先不花貢珠寶皮幣馬駝賜鈔一萬三千

六百錠 二年諸王也先不花進馬駝璞玉 七年英時

宗已即位禁獻珍寶

英宗即位有獻七寶帶者因近臣以進帝曰朕登大位不

聞卿等進賢而為人獻帶是以利誘朕也其還之

胡粹中曰英宗初立責近臣以不進賢而為人獻帶從

張養浩之諫而罷元夕張燈使出於中心至誠進而不

已其為盛德豈可量哉未幾即以製珠衣工緩杖將作

院使則是非真能賤貨貴德者矣以諫造寺而殺御史

觀音保等則是非真能克已從諫者矣書曰德惟一動

罔不言德二三動罔不凶英宗二三其德如此能無南

坡之及乎 至治二年諸王怯伯進文豹及海東青鷓

三年禁獻山場湖泊之利 是年征東末吉地兀者

戶以貂鼠水獺海狗皮來獻詔存卹三歲

泰定帝泰定元年安南國世子陳日熿貢真州珠金 二

年諸王不賽因貢珠賜鈔二萬錠 二年諸王月思別

獻文豹賜金銀鈔幣有差又獻玉及獨峯駝 罷福建

歲貢蔗錫 阿察赤的斤獻木綿大行帳 四年諸王

槃思班不賽因等以文豹西馬佩刀珠寶等物來獻賜

金鈔萬計 十月諸王脫別帖木兒等獻玉及蒲萄酒

賜鈔六千錠 十二月諸王孛羅貢硃砂賜鈔二千錠

瓜哇獻金文豹白猴白鸚鵡各一

文宗天曆元年以河南江西湖廣入貢鴛鴦太頻令減其數以省驛傳占臘國貢羅香木及象豹白猿

按貴與考凡外國貢獻俱不錄豈以不列職方非任土歟元起沙漠版圖海外則視諸國猶六服耳故稍摘其雅馴者著於篇且亦以志胡人之好尚至順元年中

書省臣言舊制正旦天壽節內外諸司各有贊獻頃者罷之今江浙省臣言聖恩公溥履疇無疆而臣等殊無補報凡遇慶禮進表稱賀請如舊制為宜從之三年雲南景東甸蠻官遣子來朝獻馴象乞陞甸為景東軍民府常賦外歲增輸金五千兩銀七百兩許之欽察

台以名園為獻命御史臺給贖罰鈔千錠酬其直至順之際諸王亦屢有進獻

順帝元統二年却天鵞之獻至正十二年齊王獻馬一萬五千匹

各省所貢惟閩可攷聊錄於左

福州路錦荔枝二十萬顆錦員眼二十萬顆柑二

千二百顆橙三千顆俱閩侯官鮎魚皮一百二十

張福清州閩侯官懷安長樂羅源五縣貢沙魚皮一百五張福清州閩侯官長樂

連江羅源五縣貢繡段一百匹柶櫛二百領刺白繫腰

泉州路砂哩咧金櫻煎金櫻子一十石

福寧州沙魚皮一十五張御茶連寧貢

續文獻通考卷之三十三
皇明進士雲間王圻纂輯
土貢考
內地常貢
南直隸宜興縣貢芽茶一百觔
內二觔上禮部廬州府六安州貢芽茶三百觔
廣德州貢芽茶七十五觔
建平縣貢芽茶二十五觔
浙江湖州府長興縣貢芽茶三十觔
五觔
南京紹興府嵊縣貢芽茶八觔
會稽縣三十二觔
溫州永嘉縣貢芽茶一十觔
樂清縣一十觔
杭州府臨安縣貢茶二十觔
富陽縣茶二十觔
寧

續文獻通考卷之三十三

土貢考

皇明

內地常貢

南直隸宜興縣貢芽茶一百觔
內二觔上禮部廬州府六安州貢芽茶三百觔
廣德州貢芽茶七十五觔
建平縣貢芽茶二十五觔
浙江湖州府長興縣貢芽茶三十觔
五觔
南京紹興府嵊縣貢芽茶八觔
會稽縣三十二觔
溫州永嘉縣貢芽茶一十觔
樂清縣一十觔
杭州府臨安縣貢茶二十觔
富陽縣茶二十觔
寧


波府慈谿縣貢茶二百六十觔 處州府麗水縣貢芽
 茶二十觔 金華縣茶二十二觔 衢州府龍遊等縣
 貢芽茶共二十觔 台州府臨海等縣貢芽茶一十五
 觔 嚴州府建德縣貢芽茶五觔 淳安縣五觔遂安
 縣三觔壽昌縣三觔 桐廬縣二觔分水縣一觔 江
 西南昌府貢芽茶七十五觔 南康府二十五觔 贛
 州府一十一觔 袁州府一十八觔 臨江府四十七
 觔 九江府一百二十觔 瑞州府三十觔 建昌府
 二十三觔 撫州府二十四觔 吉安府一十八觔
 廣信府二十二觔 饒州府二十七觔 南安府南新
 縣一十觔 湖廣武昌府貢芽茶六十觔 岳州府湘

陰縣六十觔 寶慶府邵陽縣二十觔 武岡州二十
 四觔 新化縣十八觔 長沙府安化縣貢芽茶二十
 二觔 寧鄉縣二十觔 益陽縣二十觔 湖廣共二百
 觔內十八觔
南京 福建建寧府建安縣貢芽茶一千三百六十觔
 內探春二十一觔先春六百四十三觔次春二百六十
 二觔紫笋二百二十七觔薦新二百一觔 崇安縣貢
 茶九百四十一觔內探春茶三十三觔先春三百八十
 觔次春一百五十觔薦新四百二十八觔計各處貢芽
 茶共四千二十二觔

太祖洪武二十四年九月 詔建寧歲貢上供茶聽茶戶
 採進有司勿與 勅天下產茶去處歲貢皆有定額而

建寧茶品爲上其所進者必碾而揉之壓以銀板爲大
小龍團 上以重勞民罷造龍團惟採茶芽以進其品
有肆曰探春日先春次春紫笋先是置茶戶五百免其
徭役俾專事採置久之有司恐其後時嘗遣人督之茶
戶畏其逼迫往往遺賂 上聞之乃有是命 直隸寧
國府宣城縣進木瓜三千三百箇內上瓜二千八百中
瓜五百 廣西思明府貢消毒藥五百三十四味共三
千零八觔 內錦地羅一味重二觔消食藥十味消毒藥
十八味重十九觔大衝藥一味重一觔塞住
六味重 四川成都府貢藥材七味天雄二十對附子
四觔 二十對川烏三十對漏蘆二十觔仙茅二十一觔補
脂十五觔巴豆四觔

南京各衙門每年起運各項物件三十起實用船一百
六十隻司禮監制帛一起實用船五隻筆料一起實用
船一隻守備處鮮梅一起四十扛或三十五扛實用船
八隻枇杷四十扛或三十五扛實用船八隻楊梅一起
四十扛或三十五扛實用船八隻尚膳監笋一起四十
五扛用船八隻鱔魚一起四十四扛實用船七隻又鱔
魚一起四十四扛 以上六起 實用船七隻守備處解鮮
橄欖等五十五扛實用船六隻鮮茶一起十二扛實用
船四隻木樨花一起十二扛實用船一隻石榴柿子一
起四十五扛實用船二隻甘橘甘箴一起五十扛實用
船一隻尚膳監天鷲等一起二十六扛實用船三隻醃



柴臺等物一百三十二罈實用船七隻筍一起一百一
十罈實用船五隻乾鮓魚等物一百二十罈實用船七
隻紫蘇糕等物二百四十八罈實用船八隻木樨花煎
等物一百五罈實用船四隻鷓鴣等物一起十五扛實
用船二隻司苑局葶齋一起七十扛實用船四隻苗薑
一起一百擔實用船五隻薑種芋頭等物一起八十扛
實用船五隻十樣果一起一百四十扛實用船六隻魚
藕一起六十五扛用船五隻 內府供用庫香稻一起
五十扛用船三隻苗薑等物一百五十五扛實用船六
隻十樣果一百一十五扛實用船三隻御馬監首宿種
一起四十扛實用船三隻

會典載各處辦野味共一萬四千二百五十隻至弘治中
歲辦一萬四千五百一十四隻又活鹿二百六十七隻
活天鷲三百二十隻各處歲辦雜皮二十一萬二千張
至弘治中歲辦二十四萬七百六十一張各處歲辦翎
毛一千三百五十五萬六千根至弘治中歲辦二千二
百七十六萬六千五百五十根諸貢視昔已增矣

孝宗弘治十八年春二月吏部尚書馬文升疏請革大弊
以蘇軍民云我 太宗文皇帝遷都北平其南京并各
處進貢方物尚未有皇馬快船之差至宣德正統年間
以後或裝載薦新品物及南京所造飾簾等項用船數
多所過州縣動撥人夫千百名其夫俱係附近州縣衛

所出銀顧覓少則用銀數十兩多則三五十兩一年之間自儀真抵通州所用顧夫等項銀不下數十萬俱係下民膏脂而不係賦稅洪武以來軍民未嘗遭此困苦來京馬快船隻其弊固多而進鮮者其害為甚且進鮮乃朝廷敬奉祖宗之意固不可缺今所進物若青梅小竹筍蒿苔菜宣州梨蓋因太祖高皇帝踐祚之時所用故猶進奉供薦今京師果品蔬菜雪梨青杏比南京所產者其味尤佳隨時供薦亦可將敬又奚待於南京者况我列聖相承咸以愛養黎元為心雖皇上篤於大孝以奉祖宗但祖宗在天之靈憫念軍民困苦亦必為之不憚出望將前項薦新如青梅蓮藕

宣州梨苔菜之類於中量免進奉省少船隻楊梅枇杷鱔魚北方不產者照舊進奉供薦其餘若馬槽飾鮫之類止運竹木來京着落此處該衛匠役編造應用仍勅南京兵部今後差撥馬快船隻務照准奏事例滿船裝載不許多撥沿途擾人庶馬快船隻減其多差而沿河軍民免其擾害之弊矣疏入 上大喜

歷年事例

國朝凡貢獻金銀器皿珍珠段疋等先白具奏次日照進內府俱付長隨內使收受凡貢獻蘇木胡椒香臘藥材等所在布政司即會同都司按察司官檢視物貨呈報數目差人起解來京

太祖洪武甲辰江西行省以陳友諒鏤金床進一太祖謂侍臣曰此與孟昶溺器何異以一床工巧若此其餘可知覆車之轍不可蹈也命毀之元年戊申蘄州進輦上謂廷臣曰古者方物之貢惟服食器用故無耳目之娛玩好之失今進竹輦固爲用物但無命來獻恐天下聞風爭進奇巧勞民傷財自茲始矣却之仍詔四方非朝廷所需者毋妄獻

成祖永樂二年秋九月周王肅自獻騶虞於闕下群臣稱賀上顧謂侍臣曰祥瑞之來亦令人驕騶虞若果爲祥在朕更宜加慎五年廣東布政使徐奇以進香至京隨載嶺南土物欲遺諸大臣及侍臣之任事者

奇因有所列單忽失之有中官拾以聞成祖特召楊士奇出單示之且問卿何獨無名士奇對徐奇初赴廣東衆作詩相贈而臣病未作土物之饋蓋答詩文耳且臣觀單內土物不過藤枕藤篔蘇合香丸之類皆微物非重貨無他意成祖卽取單目付中官燬之一無所問惟諭士奇曰爲臣當戒私交爲士當務清謹

憲宗成化壬寅廣東左布政使彭韶上疏請罷貢獻先是鎮守內臣顧恒歲有進貢之儀里胥乘機科索民不勝其擾故有此疏

世宗嘉靖四年寧波知府楊最言本郡僻處海隅地不產桑所貢綺繒乞改貢價料從之令今歲諸幣未具者俱

續文獻通考 卷之三十三
聽入金 甲子年廣西進葛布二百疋三月四川布政
司進年例川扇一萬一千五百四十把 蜀王進金錢
鉸扇一千二把及籩扇六十把 夏四月 命四川布
政司仍造川扇柄小者增二百把細巧者五百把同年
例進不許粗重 河南扶溝縣民盧大亨以女盧氏進
受之給大亨月米一石仍免雜差是女年十三頗知書
史 雲南巡撫敖宗慶進象十一隻 五月太醫院御
醫王金獻壽桃香一座及鮮芝二十本八月又以香山
三座鮮芝三十六本及寶燭鮮桃等進奏云以隆甲子
仰祝萬壽 上悅 命內監收 賜銀八兩 吉王進
紵絲四端恭祝甲子年萬壽以同天永 六月秦王獻

銀一千兩恭賀甲子萬壽 致仕大學士嚴嵩以鳳眼
等香四十三炷進 上喜 賜銀五十兩紵四表裡
廣東進珍珠三千二百餘顆 提督兩廣侍郎王桂芳
進龍涎香六十兩 鎮守雲南黔國沐朝弼以 賜建
忠愛祠進馬十疋 陝西 肅王請建清醮延萬壽仍
進馬四疋 丙寅秋八月戶部以廣東香品進 上覽
而悅之 詔加彼處督巡官俸一級 冬十月太醫院
御醫王金以延壽香五萬蒂仙籍醫方五十五本進
戶部進綠石三塊共重三百五十六觔 是時張翀疏
停額外貢獻其畧云臣聞帝王之盛貢獻出於租入之
中而邦本安苟且之政貢獻浮於租入之外而國脉耗

伏覩 皇上登極 詔旨有額外進貢一切停止之言
已仰窺 陛下仁聖天至不欲重困軍民以適其私但
各鎮守總兵等官不能仰體聖懷講求 德意或託舊
例以誤 天聽或假謝恩以售已私 陛下未究所從
來承前之訛遂後之失格 恩旨於不信啟貪戾於方
來臣竊爲 聖明惑之節查得會典 內府織造所用
紅花於所產之處稅糧內折收如山東河南二處俱有
定數其法一成而不變其額百世而不虧而寧夏鎮總
衙門所貢紅花蓋不繫令甲之內特一時喜事獻諛之
徒創爲此舉以誤 先朝前大學士楊一清亦嘗建白
爲停免而沮於群咻未得俞允之 命因循持疑遂爲

厲階夫寧夏地方孤懸河外與北虜爲隣其間雖有平
衍田疇類多鹹鹵寒冷之地而所入之花播種耕耨看
守採擇之苦不可勝言歲無豐凶例取登足往往督趣
窮軍出錢賠補自甲及乙及丙操切嚴峻莫敢或後而
又程途遠輸運艱難起役丁夫僱倩車馬以及指稱
盤費打點使用尤爲不貲 朝廷之所得幾何而計其
所耗固已百倍於所貢之數此愚臣之所爲長太息也
至於鎮總等官到任未幾輒有獻馬之舉名爲謝 恩
此實 先朝敝風蓋喜其能充吾之腹而不悟其割吾
之肉取其能適已之欲而不知其傷吾之心而其流弊
至中官旁午道路依憑別 旨以發府庫之財假托供

奉以糜縣官之物此 陛下之所深知而痛心疾首者
也昔 皇祖却竹簟之進 仁宗動色於黃驢買湖之
奏 英宗拒海漚馬駝之進 祖宗之所以結人心凝
天命以培千萬載不拔之基者典則具在是固 聖子
神孫所當服膺而遵承之者也况今物力凋耗之餘軍
民困苦之後 陛下於先年實徵錢糧歲辦織造等項
皆已量免顧此額外貢獻之害未能蠲除此非特鎮總
官之罪也伏願 陛下上繩 祖武下憫人窮亟為停
免凡不係有司額貢者並不許貢獻以擾軍民庶幾不
失 詔旨之初意而有以廣大信於天下興利之源永
塞而邦本安固不搖矣 三十六年雲南布政鮑道明

獻璽石一萬五千八百顆 四川巡撫黃光昇獻礦砂
五百觔

今上萬曆六年蜀府進扇回 賜銀三百兩大紅金綵常
服三襲若係世子改綵段四表裏銀同差來人賞鈔五
百貫 十年 賜親王大紅織金閃色團龍常服紵絲
一襲紗一襲羅一襲管理 親王府事者與 靖江王
各大紅織金團龍常服紵絲一襲 二十六年二月
蜀王進扇 上賜銀一百兩大羅常服一襲 二十七
年五月雲南土司景從等進貢象一隻及金壺銀盤孔
雀尾

外夷常貢物

朝鮮

金銀器皿 各色紵布 白細花蓆 人參

豹皮 獺皮 黃毛筆 白綿紙

安南

金銀器皿 薰衣香 降真香 沉香 速香 木香

黑綠香 白絹 犀角 象牙 紙 扇

暹羅

象牙 犀角 孔雀尾 龜筒

六足龜 寶石 珊瑚 金戒指 片腦

糖腦 腦油 腦紫 檀香 速香

安息香 黃熟香 降真香 羅斛香 乳香

樹香 木香 烏香 丁香 阿魏

薔薇水 丁皮 琬石 柴梗 藤竭

藤黃 琉黃 沒藥 烏爹泥 肉豆蔻

蘇木 烏木 大風子 苾布 油紅布

白綿頭布 紅地絞節智布

紅杜花頭布 西洋布

紅撒哈刺布 紅邊白暗花布

乍連花布 馬邊葱白暗花布 細棋子花布

織花紅絲打布 紅花絲手巾

織人像花文打布 剪絨絲雜色紅花被面

織人像雜色紅花文絲縵

琉球

馬 琉黃 蘇木 胡椒 螺殼

海巴 刀 生紅銅 錫 牛皮

擢子扇 磨刀石 瑪瑙 烏木 降香

木香

占城

象 象牙 犀 犀角 孔雀

橘皮味身香 金銀香 奇南香 土降香

檀香 栢香 燒碎香 烏木 花梨木

蘇木 花藤香 蕪蔓番沙 紅印花布

白綿布 油紅花布 烏綿布 圓壁花布

花紅邊縵 雜色縵 番花手巾 番花手巾

兜羅錦被 洗白布泥

真蠟

象 象牙 蘇木 胡椒 黃蠟

犀角 烏木 黃花木 土降香 寶石

孔雀翎

日本

馬 盔 鎧劍 腰刀 鎗

塗金裝彩屏風 牛皮灑金厨子 灑金文臺

灑金手箱 描金粉匣 描金筆匣

描金提銅鈔 灑金木鈔角盞 貼金扇

瑪瑙 水晶數珠 硫黃 蘇木

瓜哇

胡椒 葦艾 蘇木 黃蠟 烏爹泥

金剛子 烏木 番紅土 薔薇露 奇南香

檀香 麻藤香 遠香 降香 木香

乳香 龍腦 血竭 肉豆蔻 藤竭

阿魏 蘆薈 沒藥 大風子 丁皮

脊木鼈子 碗石 悶蟲藥 葦澄茄

烏香 寶石 珍珠 錫 西洋鐵

鐵鎗 摺鐵刀 苾布 油紅布 孔雀

火雞 鸚鵡 玳瑁 孔雀尾

翠尾 鶴頂 犀角 象牙龜筒 黃熟香

安息香

白瑣里

馬 紅撒哈刺 紅八者藍布

細番布 覬木里布 白苾布

珠子頂串

西洋瑣里

黃黑虎 馬

三佛齊

黑熊 火鷄 孔雀 五色鸚鵡 諸香

苾布 堯羅錦被 白獺 龜筒

胡椒 肉豆蔻 香油子 米腦

黑淳泥 火麩 此書 五色麩 齒香

珍珠 寶石 金縷環 龍腦 牛膝

梅花腦 玳瑁 降香 金戒指 檀香

丁香 沉速香 黃蠟 犀角 肉豆蔻

龜筒 申螺殼 黑小廝 鶴頂 熊皮

倒掛鳥 孔雀 金銀八寶器 五色鸚鵡

黑百花 此書 此書 此書

白鹿里 紅猴 龜筒 玳瑁 孔雀

胡椒 象牙 倒掛鳥

彭亨 此書 此書 此書 黃線香

金花罐 檀香 乳香 速香 片腦

胡椒 象牙

淡巴

苾布 兜羅錦被 沉香 檀香

速香 胡椒 沉香

西古里 此書 此書 此書

寶石 金繫腰 珊瑚珠 琉璃碗 佛郎

奴刃刀 寶鐵刀 蘇合油 阿思模達塗兒氣

龍涎 梔子花 花檀單伯蘭布 苾布

木香 紅絲花手巾 番花人馬象物手巾

乳香 線結花靠枕 檀香 胡椒 錫

滿刺加 犀角 象牙 玳瑁 黑鶴頂 手巾

番小斯 犀角 象牙 玳瑁 黑鶴頂 手巾

鸚鵡 黑熊 黑猴 白鹿 鎖袂

金母鶴頂 金廂戒指 撒哈刺

白苾布 薑黃布 花縵布 撒都細布

西洋布 梔子花 薔薇露 片腦 黃速香

金銀香 降真香 紫檀香 大風子 沉香

乳香 丁香 烏木 蘇木 番錫

番鹽 沙羅 黑小斯 花蕉布 珍珠 玳瑁殼 黃蠟

降真香 番小葛蘭 白綿布 胡椒 水晶 蘇木 沉香

象牙 熟腦 榜葛刺 馬鞍 錢金琉璃器皿 青花白磁

馬 糖霜 撒哈刺 者抹黑荅立布 洗白苾布

兜羅錦 鶴頂 犀角 翠毛 鶯哥 乳香

麝黃 熟香 烏木 紫膠 藤竭

烏香 蘇木 麻藤香 烏爹泥 胡椒

續文獻通考 卷之三十三 右 二十二年京

錫蘭山

寶石

象鼻

沒藥

胡椒

蘇門答刺

馬

寶石

胡椒

番刀

蘇祿

珊瑚

水晶

木香

蘆薈

西洋細布

龍涎

丁香

錫

石青

金戒指

撒哈刺

樹香

硫黃

烏木

撒哈刺

降真香

水晶

硫黃

回回青

撒哈刺

土檀香

烏木

烏木

梭眼

沉速香

瑪瑙

瑪瑙

瑪瑙

瑪瑙

梅花腦

降香

番錫

迤北瓦刺

馬

泰寧

馬

海西女直

馬

兔鵲

哈密

竹布

胡椒

蘇木

蘇木

貂鼠皮

貂鼠皮

貂鼠皮

貂鼠皮

舍利孫皮

阿膠

阿膠

玳瑁

黃蠟

黃蠟

黃蠟

海青

海青

海青

海青

海青

殊角

殊角

馬 駝

玉

速來蠻石

青金石

把咱石

鐵器

諸禽皮等物

烏思藏

畫佛西文銅佛

銅塔

舍利

各色足力

各色鐵力麻

各色氍毹

珊瑚

犀角 左髻

毛纓

蘇油

明盔

明甲 刀劍

長河西魚通寧縣等處

各色足力麻

各色氍毹

各色鐵力

珊瑚 舍利

犀角

左髻

明盔

畫佛 毛纓

各色足力麻 各色氍毹 明盔

長刀 左髻

各色鐵力麻

明盔

董卜韓胡

各色足力麻

各色氍毹

各色氍毹

各色足力麻

遮甲麻衣

珊瑚

各色鐵力麻

明盔

白毛纓 黑毛纓

黃右髻

紅毛纓

鐵甲

四川威州保縣金川寺番僧雜谷安撫司達蠻長官

司及松番茂州等處 陝西洮岷等處番僧洮岷等

青處番族

馬

銅佛

舍利子

酥油

青鹽

畫佛 足力麻 鐵力麻 璣璣 左髻

青木香 大明盛 明甲 腰刀

歷年事例 宣化等處 西戎等處 宣化等處

成祖永樂甲午秋九月榜葛刺國以麒麟來獻 明年秋

九月麻林又獻麒麟行在禮部尚書呂震請至日率群

臣上表稱賀不許時祭酒胡儼作麒麟賦奏之

宣宗宣德八年閏八月西南海外諸番國或戎王或子弟

或大酋各泛海數千萬里而來朝及貢麒麟獅象珠玉

珍貝奇異之品麒麟凡四而出非一所 甲寅冬甘肅

以龍獻

憲宗成化戊戌西夷扣嘉峪關來獻獅子御史徐綱按計

肅令守關者勿納疏上不從 辛丑西域以二獅子進

遣中官往迎之先是西域撒馬兒罕既至嘉峪關遣人

入奏乞 賜大臣迎接職方郎中陸容禮書周洪謨俱

言不可遣大臣事遂寢而遣中官迎焉

按獅狀如黃狗頭大尾長各有

鬚每獅日食活羊一鞋醋酣蜜酪各一瓶養獅人俱授

以光祿給酒飯費亦浩大黃氏瑜曰獅本非瑞應日食

孝宗弘治中倪岳上疏請絕阿黑麻王所貢獅子其畧曰

撒馬兒罕所進獅子乃夷狄之野獸非中國所宜蓄留

之於內既非 殿庭之美觀置之於外亦非軍伍之可

用日逐喂飼之費及 賜銀幣俱以府帑之財帛百姓

之供億以彼無用之物易此有用之財切為 朝廷惜

之 皇上踐祚之初首頒 明詔禁止各處鎮守等官
進貢騷擾之弊既而放禽鳥縱鷹犬旬日之間屏逐無
遺元年因迤西夷人進貢玉石等物却令帶回又因雲
南鎮守太監王舉欲進寶石物嚴申禁絕善政善教遠
近稱頌以爲 聖德恭儉蓋與成湯之不殖貨利同符
而一致今未及三年又欲納此無益之物不爲 聖德
之累乎且令其習知海道啟意外之虞况各處地方水
旱相仍人民窮困却乃疲中國以供遠夷臣等愚見深
爲未便伏望 皇上念生民財力之艱難察夷人詭冒
之姦計斷自 宸衷阻回其使盡却所貢則遠方夷醜
盡知 明天子之所爲非彼之所能測也

世宗嘉靖二年夏四月魯迷王貢獅子西牛西犬西馬及
阿骨刺馬駝珊瑚珠玉巡撫陳九疇以聞科臣鄭一鵬
奏乾明諸所禽獸尚多仰給大官日費豆秣而魯迷所
獻皆非土性受之奚益乞就彼犒遣以光 聖德以杜
窺伺後禮官竟更 上受之 八年滿速兒遣人貢獅
子願歸哈密城及諸夷使所掠人口以求牙木蘭夏言
疏各夷朝貢有常期夷使有定數今土魯番投檄幾二
百人以索牙木蘭爲詞要賞不貲宜 勅都御史趙載
查酌定數勿貪納欸之虛名失禦夷之上策 上允之
十九年雜谷安撫司刺麻僧都綱定日藏等十五人
僧衆一千五百人貢珊瑚氍毹初制羗戎入貢必由嘉

峪關是年由四川入而都司為送至京 上曰各僧姑
資遣還所司送不以制其覆以聞 二十六年總督宣
大翁萬達言俺荅求入貢巡按黃如桂言虜自火篩作
梗貢禮久廢辛丑歲石天爵駕言入貢迄為邊患方欲
殲虜雪憤豈可墮其計中乞嚴 勅防守毋為所欺
上允之 是年延綏守禦李鉞計殺貢夷遇伏發覆敗
事聞收訊論死 二十八年八月虜酋俺荅狼台吉入
大同仇鸞賂令他往遂東從朶顏三衛入寇薊州攻古
北口掠密雲昌平至東直門執 御廐內臣八人令致
書求入貢京師大震 上詔嚴嵩徐階李本入便殿示
以虜書會廷臣集議群臣相顧莫敢發司業趙貞吉抗

言貢決不可許宜立募格獲一虜首予百金捐十萬金
虜且立盡嵩請即擢貞吉兼御史齎萬金往募虜由鞏
華城犯 諸陵掠西山 上疑本兵丁汝襲勤王楊守
謙貳于虜棄西市貞吉謫荔浦典史虜將金帛人畜北
去京師解嚴 甲子春正月回回國以獅子進御馬監
太監高忠奏撥軍士十名校尉二十名喂養看守 陝
西博峪等族番人姚革等進貢方物給賞如例 貴州
宣慰使司土舍安國亨遣人貢馬如例給賞之半 海
西者刺等衛女直夷人都督阿失卜等來朝貢馬宴賚
如例 海西脫木河衛女直夷人那台失等來朝貢馬
宴賚如例 朝鮮屢遣陪臣鄭惟吉等進方物 賜宴

并金織衣綵段絹布有差 海西忽里等衛女直夷人
 哈兒哈麻等來朝貢馬宴賚如例 湖廣保靖宣慰司
 土官彭養正遣人貢馬賞幣鈔如例 琉球國中山王
 尚元遣使貢方物及馬宴賚如例 泰寧等衛夷人吳
 兒族等貢馬宴賚如例 貴州青山等十二長官司通
 把蔡志祿等來朝貢馬給賞如例 四川酉陽宣撫貴
 州凱里安撫司各遣人朝貢進馬賞賚如例
 今上萬曆元年俺答黃台吉嗣王更名乞慶哈扯力克嗣
 封龍虎將軍

貢物

雕翎箭

馬

鍍金鞍轡

撒袋

達弓

二年貴州宣慰司土舍安國亨播州宣慰司使楊烈俱
 遣土目來朝貢馬宴賚如例 四川越雋等衛長官司
 遣土目李春等來朝貢馬宴賚如例 朝鮮國署國事
 李昞遣倍臣柳景深貢馬及方物 四川烏撒軍民府
 土舍安承祖貴州宣慰司土舍宋一清廣西南丹等土
 目族莫懷等貢馬宴賚如例 西番魯班等七寺刺麻
 番僧劄石嶺占等貢馬及方物宴賚如例 泰寧等衛
 都督只兒族等遣頭目升合兒等貢馬宴賚如例 廣
 西太平等府四川平夷長官司土舍王良等湖廣保靜
 司通把田仕等各來朝貢馬宴賚有差 朵顏等衛夷
 人伯彥帖木兒泰寧等衛夷人沙蠻等俱貢馬宴賚如

例 陝西崇隆等六寺刺麻番僧共卜尖咎等進馬及
方物宴賚如例 四川烏蒙府土官阿琦天全招討使
司土舍高玉等廣西太平府頭目黃猛龍英州官族趙
福等各貢馬宴賚如例 四川疊溪鬱卽二長官司遣
人貢馬宴賚如例 廣西泗城州土官岑紹勳遣人入
貢方物宴賚如例 貴州小平伐長官司木瓜麻響大
華三長官司羅番金石二長官司洪番盧番二長官司
金筑安撫司四川沐川長官司各遣人來朝進馬宴賚如
例 陝西鷄子坪等族番人盛列等貢馬及方物宴賚
如例 廣西田州土官岑大祿遣人來朝貢馬宴賚如
例 廣西田州歸順州四川石柱安撫司各遣人貢馬

賞賚如例 雲南麗江軍民府土官木高遣人貢馬及
方物宴賚如例 四年都統使莫茂洽遣使慶賀并補
貢二次 漢東左衛都督阿東把力等入貢宴賞如例
建州左衛女直都督王忽等人貢宴賞如例 茂州
衛韓胡礪合列寺都綱頭目納完等人貢宴賚如例
濟衛扯把寺禪師刺麻番僧鎖南咎堅等法藏等寺番
僧相竹領占等魯班等寺僧星吉劄等車祿等族番人
劄節等各入貢方物宴賞如例 五年陝西魯班等寺
四川韓胡礪恰列寺番僧星吉劄等入貢方物宴賞如
例 貴州宣慰司土舍安國亨程番等長官司凱里安
撫司四川鎮雄府烏撒軍民府寧戎巡檢司平夷等長

官司西陽宣撫司廣那地等州各遣人來朝貢馬各給賞如例 四川疊溪等長官司石砭宣撫司遣通把事郭成等來朝貢馬以過期給半賞 廣西龍英州陀陵縣四川天全六番招討司邛部長官司各遣官族趙忠信通托高登來朝貢馬給賞如例 陝西崇隆等六寺刺麻番僧六卜尖咎等三十人進貢方物賞賚如例 廣西都康等州土官遣頭目農容等來朝貢馬給賞如例 海西者刺等衛女直都督阿失卜等來朝貢馬宴賚如例 虜酋順義王俺荅并昆都力哈等貢馬五百九匹遣夷使捨布崆羅等貢上馬三十疋銀鞍一副 禮部請遣官祭告 郊 廟 社稷仍請 皇上御殿

宣表受百官賀以彰 聖朝盛事許之 海西右傍其剌等衛女直都指揮等官乃哈等來朝貢馬宴賚如例 西咬郎兀等衛女直夷人都指揮大漢等來朝貢馬宴賚如例 建州左等衛女直夷人都督勝力等來朝貢馬給賞如例 陝西多杓等十七族番人板官等進貢方物馬四匹給賞如例 套虜吉能等差夷使貢上馬二十疋餘馬一百八十疋賞彩幣有差 建州左等衛都督等官安台失等來朝貢馬賚賞如例 土魯番王馬黑麻差夷使卯刺納阿必卜刺等貢方物馬匹宴賚如例 琉球國中山王尚元遣貢馬及方物宴賚如例 朝鮮國王李昞遣倍臣金陵原等進馬及方物

泰寧等衛夷人頭目升合兒等俱賜宴賚六年
題准各夷來京應賞人數凡折衣折段銀兩行工部俱
給以見貯銀兩不必轉行該省其支查勘合及在邊半
賞人數銀兩禮部先咨巡撫衙門轉行布政司仍另給
夷人爲照待到日將夷人領去勘合與禮部先發咨文
對同方准支給其存留在邊全賞人數銀兩禮部驗封
明白亦咨巡撫衙門與夷人所執公文查考相同給發
仍將各項銀段及食茶數目行都督府填入過關勘合
以便互校差去通事官令守取巡撫回咨備開散過齋
去存留銀段若干支過茶食及半賞銀兩若干以免誑
騙沉匿等弊如咨內數目不合及無回咨將通事從重

參問 時又題准貢夷病故在中途者例不給賞其各
鎮清查病故夷人賞物留充下年給賞之數 時陝西
亦轄等族番人木竹等各貢馬及方物賞賚如例 廣
西土官岑紹勳遣人入貢方物宴賚如例 陝西各鎮
等族番人曾已等貢馬及方物賞賚如例 四川烏思
藏朵甘思宣慰使司番僧刺麻濕等入貢方物賞賚如
例 九年都統使莫茂洽遣使復來貢亦補二次貢道
由廣西憑祥州 是年題准朝鮮琉球暹羅安南差來
使臣噶程除 欽賜及常例日支外每三人五日加給
鷺一隻雞二隻酒四瓶米一斗菓子五斤隨從人等不
加給

十九年禮部主事張我績上疏奏屬夷進貢之規以爲諸夷之種曰朶顏曰大寧曰福餘每歲入貢者以六百人計曰海西曰女直每歲入貢以千人計無亦名脩貢而實規利也到館而索當房館夫之銀起程而索車戶馬頭靴布所過州縣驛遞挾索多端有司不敢治伴送不敢拂東京一帶一聞夷屬將至其邑不啻大虜之入寇夫北虜來貢俱聽宣大總督代進其賞賜亦轉發幕府給之此隆慶中事也今之朶顏大寧福餘三衛海西女直三種獨不可做而行之耶伏乞大破拘攣循北虜事例如其不然亦宜照西番事例減其人數在彼之賞賚未嘗少靳而在我之關隘不使其慣習虛實不令其

竊窺沿途驛遞不致於摧殘州縣居民庶免其驚擾其于內夏外夷之防未必無補而久安長治之策或亦在是矣

三十年閏二月兵部奏套虜悔禍乞盟真心內附等事復總督李汶等題奉 旨套虜既真心內附該總督及延寧二鎮新舊巡撫等官定議悉稱可許不必再行會議准與開復市賞革過的不許補給以後兩鎮官務力持定額毋得聽其分外請討私輒增加仍遵前 旨一年恭順方准一年市賞有犯卽革切勿輕聽討服苟且開釁其餘俱依擬着實行違者從重叅治還着該鎮擬後長策來

朝貢土官 萬曆初年

四川

烏蒙軍民府

烏撒軍民府

蠻夷長官司

靜州長官司

播州宣慰司

平夷長官司

兵希蓬長官司

石砭宣撫司

泥溪長官司

初命簇長官司

隴木頭長官司

蠟匪簇長官司

酉陽宣撫司

麥匪簇長官司

者多簇長官司

鎮雄府

勒都簇長官司

九姓長官司

沐川長官司

阿角簇安撫司

寧戎巡檢司

太平長官司

永寧宣撫司

北定簇長官司

天全六番招討司

寒水巡檢司

阿昔洞簇長官司

疊溪鬱卽長官司

長寧縣下寧遠鄉萬里箐寨

思曩兒簇長官司

貴州

金筑安撫司

貴州宣慰司

程番長官司

木瓜長官司

方番長官司

廬山長官司

以上舊隸四川

清平衛凱里安撫司

養龍抵塞乖西水東西長官司

白納小平伐二長官司

青山中曹龍里劄佐四長官司

都勻府歸化上下二牌頭

卧龍小龍大龍韋番四長官司

廬番洪番金石二長官司

羅番上馬小程二長官司

平伐麻嚮貴竹三長官司

廣西

龍巖州

江州

龍州

思明府

陀陵縣

上下東州

思陵州

萬承州

安平州

太平州

羅陽縣

思城州

茗盈州

南丹州

思同州

東蘭州

那地州

全茗州

鎮安州

泗城州

奉議州

果化州

歸德州

向武州

歸順州

憑祥州

都康州

田州

雲南

麗江府

湖廣

永順宣慰司

保靖宣慰司

桑植安撫司

添平千戶所

凡土官差人到京鴻臚寺卽與引見并投進實封奏本其
方物赴禮部驗進 嘉靖元年議准 聖節止許各宣
慰宣撫安撫官具方物差人赴京其餘佐貳官以下及
把事頭目護印舍人止許朝覲年入貢每司量起的當
通把三二人齎執方物多者給與本冊咨批少者給與
咨批各給關文應付馬匹就彼變賣銀兩貯庫降香黃
蠟茶葉等物要實重五十五觔爲一扛每扛賞闊生絹
二疋照扛逾加其不由本布政司起送或斤重不足差
人過多不待朝覲之年擅自起貢禮部不與進收責諭
遣回賞賜應付通行停止 二年議准前數項及過限
一月俱屬違例止減半給賞若違例多端者不賞 七

年議准湖廣土官襲受宣慰宣撫安撫職事者差人慶
賀每司不許過三人其三年朝覲每司止許二人大約
各司共不過百人起送到京者不過二十人餘俱存留
本布政司聽賞所司辨驗方物造冊給批差官伴押到
京禮部驗批相同方與賞賜應付

貢物

馬	象	犀角	象鞍	象腳盤
蚌蛇膽	玉石	圍帳	金銀酒器	
金絨索	降香	青紅寶石	花藤蓆	
黃蠟	各色絨綿	檳榔	各色布手巾	
朝貢通例				

計有勘合國分

暹羅 日本 占城 瓜哇 滿刺加

真臘 蘇祿國東王 蘇祿國西王

淳泥 錫蘭山 古里 蘇門答刺

古麻刺

凡信符金牌永樂二年始置以給雲南徼外土官其制銅鑄五百內陰文者一上有文行忠信四字與四面陽文者合編其字一號至一百號批文勘合底簿其字號如車里以車字為號緬甸以緬字為號陰文信符勘合俱付土官底簿付雲南布政司其陽文信符四面及批文一日道藏之內府凡 朝廷遣使則齎陽文信符及

批文各一至布政司比同底簿方遣人送使者以往土官比同陰文信符及勘合即如 勅奉行信符之發初以文字號二次以行字號次忠次信周而復始又置紅牌鏤金字 勅書諭之凡有調發及當辦諸事須憑信符乃行如越次及比字號不同或有信符而無批文有批文而無信符者即是詐偽許擒拿赴京治以死罪又編勘合一百道付各衙門勘合底簿一扇付布政司凡有軍民疾苦及奉信符辦過事務進貢方物之類俱於勘合內填寫遣人齎至布政司比號寫底簿布政司都司遣官同齎所填勘合奏聞若邊境聲息及土人詞訟從都司布政司按察司官會同計議行之其事已行及

承行原由並填寫勘合奏聞如總兵官鎮守遇有前事
總兵官亦會三司計議仍用都司或布政司印信文書
寫總兵官處分之語方許奉行亦填寫勘合具奏若
朝廷命總兵官掛將軍印征討調遣軍馬不待三司文
移即時發遣亦填寫勘合差人奏聞填寫勘合或字畫錯
誤明白圈註以本司印信鈐蓋凡所收底簿及勘合用
之將盡具奏再頒遇改元則更造換給舊簿勘合隨貢
繳部貯庫或總兵官都司布政司等官新除官到任及
遇時節不許齎禮物相慶仍以紙寫禁約一道付之或
有貪婪無藉凌害者不待填寫勘合止具本遣人齎
勅不經總兵官及三司徑赴京陳奏治以重罪

計有勅符勘合土官衙門

車里木邦緬甸麓川平緬八百大甸老撾六宣慰司
干崖大候里馬茶馬四長官司 潞江安撫司 孟良
孟定灣甸鎮康等府 其後又有孟養等宣慰司威遠
等州亦給勘合

番夷 誥勅

初哈密等七衛俱有如朵顏海西諸衛例後乃沒於土
魯番而烏思藏長河西等處闡教闡化輔教贊善護教
五王大乘大寶二法王各處國師俱 誥命禪師 勅
命都綱刺麻都指揮指揮等俱 勅諭其闡教闡化輔
教贊善仍給勘合燬於火累年請給未與二法王及長

河西朶甘思董卜韓胡俱不給勘合其金川雜谷等處
止齋印信番文亦無勘合 嘉靖二十八年題准各處
番僧到京襲職進貢禮部置立文簿一扇將各僧齋到
舊給 誥勅所載師僧職名頒給年月及見今襲替僧
徒名字住坐地方分別已未領有新 誥新 勅逐一
登記備行布政司照式置造以後如遇應貢年分將文
冊查對如係年代久遠果有退老病故情節方許照例
起送承襲其有已襲而未領新 誥勅者照已賞未襲
職例許起送一二人如有捏作入番化夷在番病故者
不許濫放如違聽本部通將三司等官叅究治罪各番
應領 誥勅新者既給與舊者即令銷繳其新給 誥

勅俱要開載住坐地方如隨護教王進貢襲職者即稱
係護教王地方住坐某師某名其餘地方准此

共計有

誥勅夷人番僧

朶顏衛

福餘衛

泰寧衛

海西女直

建州女直

烏思藏

長河西等處

凡夷人入關嘉靖十二年令邊方一應該管官員務要盤

驗明白方許放進若

勅書內有洗改詐偽字樣即便

省諭阻回不許一槩朦朧驗放

凡夷人番本嘉靖二十六年題准該邊官審明封進若於
理法不通即省諭退還不必賣奏到京後如有番本不
係邊官封奏者不與准理

凡夷使往回嘉靖二十六年令經該巡撫衙門給與印信
文簿事畢回還者禮部給與印信文簿令所過驛遞將
夷使名數并應付馬驢車輛廩給口糧各數目初到及
起身各日時逐一登記就用本驛遞條記鈐蓋仍付伴
送人員齎往前路驛遞一體填寫事完之日伴送人員
將前簿在內送本部在邊送巡撫衙門稽考禮部仍咨
各該巡撫凡伴送夷人務選平昔畏法諳熟夷情者差
遣不得濫委擾害地方
凡譯待夷使成化間題准迤北小王子來貢禮部差該司
官一員前往大同會同鎮巡等官將差來使臣逐一譯
審分豁使臣若干隨來男婦若干赴京若干存留若干

使臣自進并帶進某頭目下馬騾方物皮張數目俱要
辨到毛齒等第編成字號填寫勘合用印鈐蓋給付各
使臣收照仍着落山西行都司備造黃冊奏繳青冊先
行送部以憑給賞其在彼茶飯并沿途供應及榆河驛
湯飯一聽本官提督

凡貢夷限制成化十九年題准烏思藏長河西朶甘思等
處國師禪師在本地方住坐者與各寺寨輪流進貢
滿每年百人之數不許各另差人如有退老事故許令
嫡親兒徒因襲職赴京進貢國師起送一百人禪師都
指揮五十人已賞未襲者再來襲職止許一二人其都
綱指揮以下來襲者止本身隨同年例貢使赴京

十一、年奏准各處招撫生番進貢行本處鎮巡等官止許寨首一人前來如五寨五人十寨十人不許過多嘉靖二十六年題准撒馬兒罕并土魯番天方國魯迷額卽卽等朝貢查照舊例每十人起送二人扣該起送赴京五十人其存留甘肅聽賞者除舊二百名外量增一百名各該給口糧照應貢人數減半給賞餘俱阻回自進并帶進馬疋合例者聽候領賞其該退還而先已給軍給驛者量給價銀今後所進方物該邊官看驗果係堪中物件方與收載冊內除正例外多餘退還各夷聽其貨賣預先省諭各夷不許將退還之物仍帶來京捏稱自進加進名色奉擾希賞 二十八年題准部綱

刺麻指揮人等亦准帶二十五人 隆慶三年議准國師禪師都指揮等襲職差人總在年例數內不許另外增加襲職之後亦不許假以謝 恩差人另貢方物各地方遇番僧進貢務將各番所齎原給 誥勅勘合及印信番本逐一查驗明白果無冒偽影射情弊方許具本起送各番地方遠近不齊貢期不必拘以三年但未及三年不許來貢不願者不強 凡諸番貢不如期及年例外多貢者叅作下次例貢之數

凡夷使病故如係陪臣未到京者本部題請翰林院撰祭文所在布政司備祭品遣本司堂上官致祭仍置地營葬立石封識到京病故者行順天府給棺祠祭司諭祭

兵部應付車輛人夫各該賞衣服綵段俱付同來使臣領回頒給嘉靖八年題准在館未經領賞病故者行順天府轉行宛大二縣預解無碍官銀三十兩發館每名給與棺木銀五錢支盡之日造冊繳部再行取用領賞以後病故者聽其自行葬埋凡投降夷人到館譯審明白兵部題請到部關給來降賞賜畢日著去該都督府差委官舍伴送兩廣軍門轉發缺少達目衛分安插仍給房屋牀榻配與妻室查照舊例養贍

凡朝鮮國漂流夷人至會同館卽行該通事序班譯審明白日給薪米養贍兵部委官伴送沿途應付至遼東鎮巡衙門另差人員轉送歸國通行國王知會如該國使

臣在館卽令帶回一體給賞施行凡差官伴送嘉靖二十七年題准兵部立與批限候回京之日查違限久近一年之外武官調衛文官罷職不叙沿途生事殘害居民者許所在官司開申撫按轉達本部叅送問罪凡交通禁令各處夷人朝貢領賞之後許於會同館開市三日或五日惟朝鮮琉球不拘期限俱主客司出給告示於館門首張掛禁戢收買史書及玄黃紫皂大花西番連段疋并一應違禁器物各鋪行人等將物入館兩平交易染作布絹等項立限交還如賒買及故意拖延騙勒夷人久候不得起程并私相交易者問罪仍于館前枷號一月若各夷故違潛入人家交易者私貨入官

未給賞者量為遞減通行守邊官員不許將曾經違犯夷人起送赴京凡會同館內外四隣軍民人等代替夷人收買違禁貨物者問罪枷號一月發邊衛充軍嘉靖三年奏准夷人貢船未曾報官盤驗先行接買番貨者比照私自下海收買番貨至十斤以上事例邊衛充軍其交結夷人誑騙啟釁教誘為亂者比照川廣雲貴陝西等處事例邊衛永遠充軍一應代替夷人收買違禁貨物者比照會同館內外軍民事例發遣包攬打造違式海船賣與夷人圖利者比照私賣應禁軍器事例處斬二十六年題准西域各地面退還貨物其在邊開市之處差委的當官員嚴行監察不得與漢人交

通別生事端 隆慶三年議准西番烏思藏等處若有

近邊奸民出外勾引希圖冒賞者聽撫按等衙門訪拿

治以交通外夷重罪

凡貢回定限萬曆七年議准分為三等朝鮮國朵顏等衛

女直限一箇月零十日安南琉球暹羅各國陝西大崇

教大能仁崇隆慧濟扯巴等寺岷洮及莊浪等處四川

金川寺加渴瓦寺長河西雜谷長寧達思蠻等處各番

僧番族限一箇月零二十日四川烏思藏番王董卜韓

胡番僧寨官人等陝西替善王弘化淨寧等寺番僧土

魯番天方國魯迷哈密等夷罕東等衛限兩箇月

各國通事

洪武永樂以來設立 御前答應大通事有都督都指揮指揮等官統屬一十八處小通事總理來貢四夷并來降夷人及走回人口凡有一應夷情譯審奏聞嘉靖初革去大通事其小通事悉屬提督官凡在館鈐束夷人入朝引領回還伴送皆通事專職 凡通事額員成化五年奏定小通事額數總不過六十名遇有病故及為事等項革去職後者照缺選補若事繁去處丁憂有過三名者量補一名計四夷一十八處額設通事六十員名

朝鮮國五員名 日本國四員名 琉球國二員名 安南國二員名 真臘國一員名 成化二十年添一名後以空閒俱不補

暹羅國二員名 占城國二員名 瓜哇國二員名

蘇門答刺國一員名 成化十九年添一名 達達七員名 成化十九年添一名

回回國七員名 同前 女直七員名 同前

畏兀兒二員名 西番五員名 成化十九年添一名

河西一員名 成化十九年添一名

緬甸一員名 雲南百夷等處六員名

世宗嘉靖元年奏 准通事丁憂緣事未結俱不作缺其有見缺十人以上及一國全缺者照舊行各邊鎮巡官訪保精通夷語身家無過人物齊整字畫端楷語音洪亮者每缺起送一人補 十七年奏准在館通事序班辦歷勤謹夷語精熟者該寺具奏量加俸秩如有恣肆


曠廢唆誘夷人爲非受賄作弊抗違該司提督官者俱聽禮部指名叅究 二十五年題准禮部會同吏部將在館通事序班人員通行考試分爲三等題請一等照舊在館供事二等量加罰治姑容習學三等黜退爲民其未經授職通事人等本部仍各選委年深通事序班題請照舊教習每日書寫番漢字語一張每月朔望責令該館序班考校月終提督主事考校季終本部通將各館官員通事人等叅錯出題嚴加考校如一年三次考居三等通事人食糧冠帶投職等項仍各案候俱以三六九年爲期通將各館官員人等一併嚴加隔別考試其夷語通曉者許照例遷轉留用不通者徑自黜退

爲民不許照常扣日挨資求進 十九年議准通事見缺訪保送部收考轉送該寺教習者俱不得過正額之半若本國正額止一名者許收候缺一名凡遇候缺既盡正額有缺許鴻臚寺呈部奏請訪保照例考滿不必拘見缺十人及一國全缺之例 二十六年奏准通事官生三六九年考滿該鴻臚寺起送到部查無違碍仍舊取官對考如果夷語精通准令給由若夷語欠熟發回習學候三箇月再考又不稱者徑自黜退爲民 二十八年題准各館中掄選年深通事曉夷語者一人立爲教師不分有無夷人每日黎明時進館督率各該通事人等演說夷語中有未能盡曉者遇有該邊原來伴

送通事許令教師詢訪務求通曉音字如三年之中教
習有效候類考之時具名奏請擢用本部仍收卯簿一
扇行令提督主事每五日令各館生畫卯如有不到者
明書于各名之下每月朔望教師引領生徒將所習音
字抽試數字夷語演說一遍季終提督官將卯簿封呈
本部以憑季考兼論其勤怠歲終備開考語封呈本部
以待三年通考其廉污季考及三年通考之時必令字
與音相兼考校 二十九年題准通事遇有各館正額
名缺將候缺通事查係類考居一等方與照依到館名
次挨補其考居二等及季考雖居一等者不許槩稱到
館在先援比求進 二十九年題准通事分撥各館之

後不許實緣告改別館違者以本部參究 又題准番僧
貢回差通事序班給批定限送至四川巡撫衙門交割
止許在省守候批文不許跟同前去 三十年題准通
事今後有患病至一年給假違限至六箇月托病不考
至三次及不赴畫卯至三箇月者官聽本部參革冠帶
通事以下聽本部徑自查革 三十三年題准暹羅國
使臣告稱驛遞刁難差通事序班給批定限送至福建
布政司交割 三十八年題准女直夷人貢回還差通
事序班押送出境 四十三年題准通事故縱夷人詐
害驛遞改行兵部差指揮等官伴送

今上萬曆元年北虜互市增至四百五十三名二年增至



五百五十七名題准行該鎮督府量加節制又奏准
 通事序班官給由或遇公差或發回習學補考或候對
 考官每遇季終不拘人數多寡禮部查明類考咨送吏
 部其緣前各項不能盡如俸滿之期者須明註咨內
 又議准各館通伴員役指稱引領交易替代使用名色
 科歛貢夷財物者禮部悉心體訪責令提督主事不時
 呈報輕則徑自處治重則具奏論罪又題准兵部差
 官不諳夷語致各夷沿途生事益甚仍差通事序班押
 送但有不自檢飭不能鈐束夷人許所在官司申呈參
 革

續文獻通考卷之三十三終

